


青鹿
村皮
遺子
稿集





成集書叢


編初

者編主
五雲王

行發館書印務商



鹿皮子集



3 0645 1894 1

陳樵撰

鹿皮子集

本館據金華叢書
本排印初編各叢
書僅有此本

鹿皮子集序

鹿皮子集者。元隱君子陳居采先生所著也。先生生當季世。遭亂不仕。遁居東陽之圍谷。水石花竹。妙絕塵寰。肆志撰述。雅不欲以詞人自見。而歷載數百。其他諸書。悉就湮滅。惟其詩僅存而已。先生詩。幽豔雕削。大率出入於溫八叉。陸天隨兩家。而古體用韻。多以真諄臻侵同用。近體用韻。多以支脂微齊通押。蓋踵吳才老之誤說。而不免於復古之僻。董紱稱其獨取古韻。不就休文三尺。非篤論也。詩前冠以古賦十餘首。縉旨綺詞中。兼饒奇氣。雖屬先生少作。然以儷揚馬。無媿色矣。余慕先生久。搜求遺書。蓋有年所。適先生邑人以是編見餉。亟爲校勘。壽諸梓氏。栞旣竣。謹揭大旨。綴諸簡末。光緒元年秋九月。永康後學胡鳳丹月樵甫序於鄂垣之紫藤僊館。

37290

083
112
2:2100

凡例

一 是集爲盧君子友所編。子友諱聯，都憲公睿之曾孫，解元公楷之子也。好詩古文辭，憫先生遺文散失，購得是編，刻之，要爲有功於先生者，故不欲逸其名。

一 舊板刻於明正德戊寅，歷一百七十八年間，多漫滅不可辨識。茲細加尋繹，共得二百七十字，其餘槩從闕文。

一 舊板旣燬於火，藏書之家，罕有存者。二卷脫去樂府一簡，殊爲可惜。

一 原序係慈谿周公旋所撰，因中多忌諱語，不及登載。

一 先生宜傳儒林，明洪武二年詔宋文憲公濂、王忠文公禕爲鑒修元史總裁官。二公皆先生同鄉，是時先生尙存，格於定例，報罷歿而文憲公爲作墓誌，今以冠篇首，使讀是集者，知先生之學爲儒學，詩賦小道，不足以盡先生也。

一 先生諸體，七言律詩獨多，舊本分三四二卷，列於絕句之後，今仍之。

一 先生詩賦曠絕千古，但命意選詞，讀者多苦其難曉，俟有餘閒，再加箋註，便成善本。

會稽後學董肇勳書

元隱君子東陽陳公先生鹿皮子墓誌銘

明史官同郡宋 濂撰

婺之東陽有隱君子戴華陽巾。裁鹿皮爲衣。種藥園谷澗中。當春陽正殷。翫落紅於飛花亭上。亭下有流泉。花飛隊泉中。與其相迴旋。良久而去。君子樂之日往觀。弗厭。旣而入大霞洞。著書。其書縱橫辨博。孟軻氏而下。皆未免於論議。元統間。濂嘗候君子洞中。君子步履出。速坐之。海紅花底。戒侍史。治酒漿。菹醢。親執罍獻酬。歌古詞以爲驩。酒已。君子慨然曰。秦漢而下。說經而善者不傳。傳者多不得其宗。淳熙以來。羣儒之說。尤與洙泗伊洛不類。余悉屏去。傳注獨取遺經。精思至四十春秋。一旦神會心融。灼見聖賢之大旨。譬猶明月之珠。失之二千年。上自王公。下至氓隸。無不佞佞。日索之。終不可致。牧豎乃獲於大澤之濱。豈可以人賤而并珠弗貴乎。吾今持此以解六經。決然自謂。當斷來說於吾後。云濂乃避席而問曰。其意云何。君子曰。吾以九疇爲六府三事。而圖書爲易象者。不可誣。以片言統萬論。而天下古今無疑義。以庸言釋經子。而野人君子無異辭。謂神所知之謂智。知天下殊分之謂禮。知分之宜之謂義。知天地萬物一體之謂仁。禮復則和之謂樂。謂天地萬物一體。經子之會要。一視萬物。則萬殊之分正。家齊國治而天下平矣。濂未達。請復問其詳。君子曰。國家天下。一枳也。枳一爾而穰十焉。枳有穰而一視之。其於人則仁也。發而視之。穰有十。則等有十。其於人。則君臣父子長幼之等夷。刑賞予奪之殊分。所謂禮也。視十爲十者。

禮之異。視十爲一者。仁之同。分愈異。則志愈同。禮愈嚴。則仁愈篤者。先王之道也。分愈異者。志愈同。故合
枳之稷。反求其故地。枚舉而銓次焉者。差之黍銖。則人已無別。犬牙錯而不齊。斂之不合。而一不可一見。
禮愈嚴者。仁愈篤。故治國家天下者。不以禮。則彝倫斁。禮樂廢。而仁亡。是故洙泗伊洛朝夕之所陳者。天
下萬殊之分。視聽言之宜。所操者禮之柄耳。故學聖人者。必始於禮焉。故一體萬殊者。孔子之一貫。於
洙泗伊洛之言。無不統者也。理一分殊之義廢。則操其枝葉。而舍其本根。洙泗伊洛之會。要不可見。章句
析而附會興。遺經不可識矣。濂受其說。以歸。閒賞質之明經者。或者曰。近時學經者。如三尺之童。觀優於
臺下。但聞臺上語笑聲。而弗獲見其形。所以不知妍媸。唯人言是信。君子之論偉矣。或者曰。伊洛之學。大
明於淳熙。未易遽取舍之也。自時厥後。爲貧游仕。奔走於四方。不及再候君子。以畢其說。聞君子益以斯
道爲己任。汲汲焉。惟恐不傳。靡晷靡夜。操觚著所見於書。書成。卽刻梓示人。復貽書於濂曰。予瀕死。言道
苦無所授。子聰明絕倫。何不一來。片言可盡也。憂患相仍。亦未及往。而天下日趨於亂。君子之室。廬亦燬。
於近寓子婿王爲家。留六年之久。遭微疾。默坐於一室。不食飲者。踰月。縣令遣醫來視疾。君子麾去曰。吾
年八十有八。其死宜矣。何藥之爲。未幾。脩然而逝。實至正乙巳十月戊申也。君子姓陳氏。諱樵。其字爲居
采。人因其衣鹿皮。故又號爲鹿皮子。表隱趣也。其先居睦之富春。宋之中葉。來徙東陽太平里。世爲衣冠
巨族。曾祖居仁。祖嘉。登仕郎。父取青。國學進士。從鄉先生石公一鼇。與聞考亭之學。有志節。嘗抗章詆權
臣。賈似道。誤國。及宋亡。元丞相伯顏。見其章。欲用之。辭。君子幼學於家庭。繼受易書詩春秋大義於李公。

直方。其於天下之書無不讀。讀無不解。學成而隱。逸然不與世接。惟寤寐羣經。思一洗支離穿鑿之陋。形於談辨。見於文辭。恆懇懇爲人道之。文辭於狀物寫情尤精。然亦自出機軸。不蹈襲古今遺轍。讀之者以其新逸超麗。喻爲挺立孤松。羣葩俯仰下風。而莫之敢抗。或就之學。則斥曰。後世之辭章。乃士之脂澤。時之清玩耳。舍六經弗講。而事浮辭綺語。何哉。少作古賦十餘篇。傳至成均。生徒競相謄寫。謂絕似魏晉人所撰。君子則諱之。不復肯爲也。君子足跡未嘗出里門。而名聞遠達。朝著知名之士。若虞文靖公集。黃文獻公潛。歐陽文公玄。皆慕之以爲不可及。移書諮訪。如恐失之。性復至孝。父患風。攀君子扶之以行。歲久益勤。後爲風痰所侵。氣弱不能吐。君子截竹爲笛。時吸而出之。母郭夫人歿。君子不見。見其遺衣。輒奉之。嗚嗚而泣。生平未嘗言利。苟非其義。千駟萬鍾弗爲動。家雖素饒。於貨痛懲。膏粱之習。惡衣菲食。以終其身。遇歲儉。輒竭粟賑里閭。自取來牟以續食。嘗發所藏錫爲器。工人持歸。乃白金也。悉易之。或以告君子。君子一笑而已。嗚呼。君子已矣。世豈復有斯人哉。君子所著書曰。易象數新說。曰。洪範傳。曰。經解。經曰。四書本旨。曰。孝經新說。曰。太極圖解。曰。通書解。曰。聖賢大意。曰。性理大明。曰。答客問。曰。石室新語。曰。淳熙糾繆。曰。鹿皮子曰。飛花觀小葉。合數百卷。君子正配朱氏。先若干年卒。生延年。大年。耆年。喬年。昌年。大年。至正庚寅中鄉闈乙榜第一。署徽州路歙縣教諭。側室某氏。生逢年。君子沒時。諸子唯喬年在。女三人。適某某。孫男九人。某某。孫女四人。適某某。曾孫男五人。某某。曾孫女三人。在幼。某年某月。葬於縣西南四十里。懷德鄉斗潭山之原。縣長貳及學士大夫門弟子咸會。莫不灑泣。葬後五年。其高第弟子楊君芾。乃爲撰。

列狀一通。而喬年同王爲持。示金華宋濂。再拜請爲銘。嗚呼。君子以超絕之姿。曠視千古。若一旦暮。期以孔子爲師。而折衷羣言之是非。不徇偏曲。不尙詭隨。必欲暢其已說。而後已。可謂特立獨行。而無畏懼者也。非人豪其能之乎。雖然。淳熙二三大儒。其志將以明道也。初亦何心於固。必使君子生於其時。與之上。其論未必無起予之歎。而君子之衆說。亦或藉其損益。以就厥中。則所造詣者。愈光輝渾融。而卓冠於先後矣。天之生材。相違而不相值。每如此。竟何如哉。然君子措慮之深。望道之切。其所傳者。確然自成一家言。殆無疑者。世之人弗察。伐異黨同。常指君子爲過高。是豈窺見其衡氣機者哉。濂也不敏。竊有慕洙泗伊洛之學。有志弗強。日就卑近。不足以測君子所至之淺深。而君子則欲進而教之。今因請銘。故備著昔日問答之辭於其首。後之傳儒林者。尙有所稽焉。其稱爲君子者。君子蓋有德之通稱。尊之可謂至矣。銘曰。洙泗傳聖髓兮。伊洛發遺精。天人旣混合兮。陽陰悉苞并。無聞不開闡兮。金石奏和平。自茲益演繹兮。自日中天行。如彼藝黍稷兮。薈去莠與稂。春實成白粲兮。詔使來者嘗。有夫起東海兮。吐言一如鏞。噲。呶達幽隱兮。務使聲遠揚。豈欲異塗轍兮。理致無終窮。著書動盈車兮。片言類括囊。中有萬寶玉兮。包絡無遺亡。解之溢衆目兮。瓌異吁可驚。似茲海外珍兮。神光燁如虹。苟施琢刻工兮。定可獻明廷。下可奉公侯兮。上可奠方明。胡爲墮空山兮。枯槁埋光晶。鹿皮剪爲裘兮。峩冠贖垂纓。臨流翫飛花兮。心與烟霞冥。清風與逸氣兮。橫絕宇宙中。食道身自腴兮。疇計祿位豐。婆娑太霞洞兮。卒以上壽終。斗潭向東流兮。內有八尺塋。鬼神必訶衛兮。靈氣結華英。永爲文字祥兮。千祀垂休聲。

鹿皮子集目錄

卷第一

賦

東陽縣學暉映樓賦

八詠樓賦

蔗菴賦

胡氏鐵心亭賦

李夫人賦

垂絲海棠賦

璫瑁賦

節婦賦

卷第二

樂府

中秋月

鹿皮子集

目錄

太極賦

迎華樓賦

閒艫賦

月庭賦

迎華觀瑞蓮賦

臥褥香爐賦

放螢賦

寒食詞

行路難

七夕宮詞

五言古詩

清隱亭

悅心亭

題松澗圖

把酒

送吉夫北上

蘭竹

樵隱圖二首

送蘇吉甫館於穆千戶家歸

同陳子俊暮秋遊耆闈山時九日後

七言古詩 長短句

宣和滕奉使茂實

送厲生之天臺

虞美人草詞

雁來紅

雨香亭

答李齊賢言別

送李仲積北上

題鄭仲潛東明山鑿池 澗

雙柏

瓊林臺

送兄遊姑蘇二首

胡伯玉隱趣園四首

蘇李泣別圖

贈拆字蔡生

寒江漁樂圖

代嘲舊人

代玉山子答

待月壇

蜀錦屏

石溪歌爲石溪和尚作

願騎牛讀書圖

五言絕句

勸兄弟十首

蘆雁四詠

除夕

送李仲積北上

七言絕句

雙峴

桂

和楊廉夫買妾歌

代答新人

題竹隱軒

天香臺

題海棠

香雪壁

胡伯玉隱趣園君子油

新涼二首

越上寶林寺八首

題畫叢竹幽禽

雪景

送孫仲明尉再到東陽省墓歸太原二首

贈馮東巨

送人之樂平

含暉亭

石

山水

江山萬里圖

策蹇衝寒圖

五言近體

投外憲列職三首

投憲幕上下六首

投李息齋父子三首

送里人都下省觀

送蒙古教授郭受益歸洛陽

徐文蔚挽歌

劉山南挽歌二首

白鸚鵡

銀谷澗山房

送沈教諭

題鄭氏義門

次周剛善僧房牡丹韻二首

春日二首

雨四首

送朱明德休寧典史二首

送張仲舉歸晉陽舉進士六首

黃晉卿見過卻歸烏傷六首

春日題水軒

送黃晉卿之任

五言排律

送烏經歷歸三十韻

卷第三

七言近體

題建炎遺詔

蚊蝶圖

飛雨洞

蘿衣洞

巴雨洞

越觀

溪亭

翻經臺

望月臺

少霞洞山居

少霞室

少霞洞

呂氏樵隱圖

太霞洞

碧落洞

五雲洞

梅墩石

陳氏山林春日雜興

醒酒石

東白草堂

銀谷澗空碧亭

圓谷澗

圓谷澗

秦素壇

招隱巖

紫薇岩

札峯

石甌峯

飛花亭

水亭

清涼臺

忘憂閣

南軒

雲山不礙樓

野芳園

蘭池

空翠堂

山齋

山園

壺天

鹿皮子墓

遊絲

臨花亭九首

遠目樓

蠟屐亭

西峴峯二

涵碧亭三首

上虞魏氏湖上精舍圖二首

霜巖石室六首

石樓草廬二首

哀江南効李義山

慧力寺斷崖

卷第四

落花圖

空碧亭老梅

菊菴

秋色觀

絕唱軒

散菴

鑾谷澗

寶掌泉

雨望臺

山莊

飛花亭三首

春日閨思

石筍

跳眼溪

園

空碧亭五首

石磴

山房

飛觀

飛雨亭

鑾谷

伏蟾山

尋春園

山館

琴臺

風香亭

席家洞

霹靂石

書房

春日題水軒

樓氏雲樓

繡衣亭

占星臺

半湯湖

暨陽湖

釣臺

翠光亭

詩林亭

玉雪亭九首

送蔡竹澗江山教諭

送余善之歸瀏陽

次王吉夫暮秋旅懷韻二首

送盧經歷歸北

金華通天洞

永日觀

拙齋

心遠菴

石廬

雪觀

三泉

瀑布

石礙樓

少微巖

西巖紫霞洞

山堂

贈蕭浣平寇

次韻黃晉卿見寄之什二首

鹿皮子集卷之一

元陳樵撰 郡後學胡鳳丹月樵校梓

賦

東陽縣學暉映樓賦

於穆玄聖。參天貳地。啓迪人文。軌物垂世。粵自漢魏以降。神明繼位。秉符握鏡。向明求治。莫不疇咨古訓。含仁茹義。用能光集聖猷。四王六帝。於是立辟雍於上京。疏泮水於侯邦。東膠西序。右學下庠。敬以禮合。德以樂章。上規勛華。下準夏商。承先王之鉅典。揚聖哲之耿光。於是萬方景附。聲教風翔。或石室講肄。或廣崇鬢宇。慶歷以來。制詳化普。應詔作宮。周于率土。講學士之雲從。偉縉紳之鱗聚。曳方屐兮秩秩。冠切雲兮踽踽。夏弦秋吹。春干冬羽。惟吳寧之下邑。實金華之東鄙。惟文儒之至盛。汎弦歌之盈耳。煌煌學廡。歲時肆祀。矯華榜之高張。煥彤扉之洞啓。黃闥凝旒。軒列棨。庖廩具脩。講堂雄峙。飛閣中起。虹采相宣。則有羣書漆版。汗簡華絨。積縹囊與紺帙。蘊瓊軸與瑤編。鼓六籍之芳風。回百氏之驚瀾。下臨萬井。夾巷迴阡。鬱層樓之天矯兮。獨孤峙於西偏。顧東隅之蒼蔚兮。翳豐草之芊芊。偉邦人之經始兮。結斯樓之耽耽。椽欂對竦。飛棟交聯。若黃鶴舉翮兮。矯將飛而未安。歎興廢之屢遷兮。乃旁屬於齋宮。登茲樓以相羊兮。愛結構之豐隆。赫華棖之參差兮。儷曼宇之彤融。浮柱離離其相距。飛甍嶻嶻以騰空。散綠霧於綃牕。

擷形雲於綺櫺。俯市列之闐闐兮。見陵壑之葱蘢。復盱衡而四顧兮。想前哲之清風。睠涵碧之蘭林兮。攬三丘之雲松。飛岑連嶂。翠碧成叢。慨仲文之才藻兮。顧沈身於慙德。猶棲棲於末路兮。臨青冥而鍛翼。仰興宗之遺烈兮。嘉幼公之殊績。相昭諫之隱居兮。思玄英之逸迹。發詞圃之春華。播風流於金石。哀相國之東歸兮。忽山林之改色。慕張生之絕塵兮。採瑤蕊於山側。俯察仰觀。感今懷昔。故凡胸耕掌錄之徒。負素挾書之侶。或奔走在廟。進旅退旅。芹茅在籩。體薦在俎。捧匱罍。灌樽薦。或張侯棲鶴。觀德是務。矇眊登歌。射夫獻舞。揖遜周旋。升降有度。或禮行鄉飲。事賓有主。詩歌合樂。獻酬明序。黻冕既稅。笙匏既去。志煩思亂。於焉遊處。或登高之能賦。託歌詩以陳志。攬翰墨之餘波兮。發高藻之遒麗。樂文學之穎秀兮。來衆士之番番。吸吳越之清風。激燕趙文學人之悲歌。洗心飾視。光英朗練。迺顧坐客起而爲亂。亂曰。華譙中天。靚以清兮。琢桂爲戶。文錦楹兮。名輦引翼。翠螭騰兮。下顧萬瓦。玄玉瑛兮。抽琴命操。朱絲鳴兮。劍光落袂。香蘭纓兮。娑娑藝圃。夫何營兮。張義爲幕。理爲繒兮。

太極賦

何太始之無始兮。塊垓希希一作夷後不知其有終兮。前不見其肇基。龐昧無朕。何象何儀。九乾何端。八極何倪。五方何屬。四維何施。非圓何覆。非方何祗。五辰何撫。六宗何司。爲天道之大原兮。有物混淪。大不知其外有兮。細又入於無倫。長上古以爲生兮。閱萬世而長存。懷道體之大全兮。命元氣以爲憑。天人於是乎成性兮。裂積氣而標形。方其函三義以爲一兮。氣磅礴而未伸。清與污其雜襲兮。曾玄黃之未分。邈沈

漭而漫誕。閔隘靄而幽紛。溟滓兮參寥。冲漠兮細縑。馮馮翼翼。杳杳眈眈。育白日於瓊池。孕明月於蓬淵。列象兮儲光。孰辨兮昭昏。於是沉奧頽垂。清陽高抗。下蓬勃而蒼甸。上扶輿而森爽。女媧揭石以傍視。儵忽廢鑿而自喪。天經地緯。成文成象。積氣舒光。昭晰清朗。川疏瀆融。海涵岳壯。四游上下。與時升降。大寓左旋。行無停輪。玉衡幹流。七政率循。其出入之息。互爲吐吞。乘氣之機。呼寒吹溫。六月一息。開陽闔陰。動爲靜基。靜爲動源。溫兮寒所伏。寒兮溫所存。極不期復。時往時來。二氣所布。是行四時。襲四爲五。五氣相滋。方青歲之開先兮。又握赤精而嗣之。襲黃靈以白藏兮。又申之以玄煒。冲氣蜿蟺。陰化陽施。彙列條分。萬類睢睢。揮動行植。跋鱗泳羽。飛人道配。天有仁有義。人去人其幾何。雖殊分而一理。無始之真。吾其性。五氣之精。吾其體。故道至察於鳶魚。氣可塞於天地也。吾嘗望元氣之輪囷兮。思邃古之開元。瞻天運之不息兮。慨萬物之芸芸。物更謝而迭瘁兮。皆太始之來昆。會昆侖之不老兮。世彌久而彌新。夫天亦不能以自己兮。吾又烏知其門哉。系曰。無始之真。肇混元兮。爲物祖始。萬象先兮。思述祖德。窮化原兮。名則無有。辭何宣兮。昔有人兮襟桂蘭。問天不對兮。餘千年。四時錯行兮。品物繁。天對甚侈兮。非無言。

八詠樓賦

融火謝。梧葉飛。碧雲暮。靈雨晞。烏有客卿。目迎歸鴻。相羊依遲。悼夕陰。望崦嵫。送日車。招月妃。于時天策焯焯。明河澄徹。烏夜啼。璠燭滅。沆瀣生。丹露浹。颺風來。飛音絕。偃靡蕪。動巾篋。微雲解。金波發。露井飛霜。陰渠沃雪。諫樹連花。封條屬葉。瓊弁盈床。玉塵生機。於是解羽衣。被須捷。發妍唱。歌皓月。傷令德之未崇。

怨急景之凌奪。胥靡先生過而詫之曰。風月無際。而客得之。所謂庶人之風月也。極目之樓。迎華之觀。在城東偏。玄暢之樓。出其西南。背梁涉宋。不知紀年。南樓黃鶴。聯鑣方輦。黃樓白雪。竝驅爭先。登斯樓以馳明。長風浩其吹衣。瓊壁霜寒。丹腹霞披。重櫺攢羅。欄楯巖巍。桷怒拱走。柱浮棟飛。椽欒澁澁。棗椳燿燿。西榮隱乎琳房。東榮昭其梁麗。閉闕在其北際。窈舍出於西垂。戶朱殷兮初日升。瓦積翠兮朝露晞。飛雲繫乎檐牙。芳塵屬乎棧題。清樾以爲簾薄。遠林以爲罽。與觀同榮。非譙而麗。顧風物之清新。瞰市列之闐闐。雖有庶人之風月。將無以容之也。客卿曰。室則盛矣。美矣。彼何以爲容室之地耶。曰。城樓所屬。山澤効奇。其南莽平。綿地百里。落脈兩端。大川交至。退不夷漫。進不迫置。畦畹皓其紛積。金沙及於河廩。迫而翫之。則倒影在庭。水紋浮袂。若泉之縈。若波之詭。釣車離合。行牒棲遲。亦有屠釣隱淪。仙舟暫駐。張志和之艇東來。李供奉之帆西去。錦袍之影未寒。款乃之聲在樹。水鳥沙禽。無今無古。其北則金石室洞玄之天。珍林建木。蔚蔚漫漫。若張羽蓋。若立曲旃。紛青繚碧。翫靈芊眠。延目視之。則水光山色。融液轆轤乎其前。非烟非雲。非埃非霧。幽玢青熒。蕤綏扶輿。若霧染空。若景涵虛。入閨闕。溢餘胥。屬上榮。周步廡。排飛闕。冒綺疏。度懸箔。依洞戶。搏之不得。攬之非無。招之不來。麾之不去。得之者不綺錯。而雕麗。值之者不塗澤。而改度。此人間之爽塏。山澤之清暉。所以娛人者也。子能從我而閱之乎。曰。高明之具。恆時揭日。志士所畏。請言其餘。先生曰。東陽之收。江左英偉。蕭子雲之翰墨。百金一字。離鴻脫手。驚蛇落紙。豔動行間。金生字裏。吳興玉唾。見之失色。漁陽豔曲。爲之褫氣。而沈謝之在越中也。翳白雲。訪芝髓。朧明月。以爲載。縷光風。

以爲餌。刺裁楚豔。鋪張漢侈。拾趙帶之餘妍。出燕裾之華詭。錦宮取其光榮。雒花得其富麗。若磔鸞鳳於
鼉鼎。屠飛龍於牛几。種光璧以成煙。解佩璫而取淚。大歷之子。獻譏建安。避其精銳者也。今都司集賢之
墨未乾。會圃登臺之詩在耳。客惠顧焉。而審定之。其視開元爲何似也。客卿曰。蕩子之春華。雲章之清翫。
非所以崇德也。請言其餘。曰。石室硯井。謝君之域。赤誦之宮。蓋金華玉寶處乎北際。鼎湖太鶴出於南中。
董方成趙廣信之窟宅。又參錯其西東。羣仙羽會。曄如芙蓉。虛步霞起。振衣爲風。目留鸞鳳。氣使飛龍。青
骨綠髓。碧瞳方瞳。四體集爲琅玕。虛白生其心胸。開陽斂秋。與元氣均。六天爲羽。八極爲門。馭鸞車。馳羽
輪。游汗漫。從列真。棲神不死之庭。煉形三丘之樊。丹砂鼎竈。荆榛蕪沒。砂雞走狗。莫知其垠。而光燄竊發。
金華朱殷。碧雞迺晨。疇昔之夜。吾嘗登斯樓。以北顧。赫焉如葵。躍焉如金。大如車輪。焜耀輪囷。得其毫髮。
則無以墮襄陽之淚。霑齊侯之襟。雍門亦無慮乎池臺之陔者也。子能從我而求之乎。客卿曰。金石之壽。
萬不得一。魯多君子。學無不殖。業之不修。其何能國耶。胥靡先生色喜而言曰。昔者晉在中葉。謝公在位。
袁宏朱轡。藹然仁風。與扇俱南。歷宋至梁。沈侯保之。以俾後賢。至於我朝。與廊廟之風。混乎爲一。浩乎如
川。雖有智者。亦莫能辨。蓋東海之先民。慕李子之風績。故尊堯堯之忠烈。潘卿貴炙之。潘卿遺直。司諫良
佑。得之。而其遺風餘烈。憲臺則之。今謝公之風。不泯而益。不落而殖。抑外憲之力耶。客亦聞之乎。否也。客
卿乃蹶然而作。周旋里巷。臨顧山溪。聞故老之緒言。昭前修之風軌。蓋沈侯方盡瘁於東陽。而梁王已撫
帶而傷已。今歷年八百。金銷石盡。城市皆非。而謝公扇上之風。至今不墜。自沈侯以下。有賢大夫繼之也。

不然則庶人憔悴雖有風月烏得而食之今天下之言曰江山不惡胡不勝衣彼徒知東陽以風月而消瘦又烏知其庶民以風月而瓠肥也哉遂稱歌曰明月爲燭兮吳越千里夫何解帶繫礪兮言不及帝抑君臣憔悴未嘗相謂耶宮中故帶不以示約欲誰示耶吁嗟乎黎庶之肥東陽之瘦梁王消瘦天下之肥也舍東陽而相國則侯之肥瘠未若是而已耶於是胥靡先生起而爲亂亂曰飛觀肆兀城東隅兮蘭堂豐屋交綺疏兮繡衣金節玉唾壺兮渠黃紫燕油壁車兮飛蓋搖裔風清途兮瓊纓華綬照碧梧兮饒花壓玉炊雕胡兮手揮五絃罷吳趨兮長吏著白兮疲民甦謀訴簡寡兮園空虛水雲在柳兮日在榆風乎大澤兮歌唐虞

迎華樓賦

昔在黃帝世有玄德敷佑下民芳猷允迪越厥帝姬踐脩曠迹誕受瑤圖冥期罔愆比質鸞儀方標鳳翥青靈既爇甘泉罷御繼龍轡之遺髻振清簫於雲路媿仙華之明秀兮夫亦靈修之所寓也伊仙華之雄峙兮實作鎮於海隅蟠元氣之淋漓泛浩翠之鬱紆候神之館既相望於東南兮又下通於鼎湖祠廟千秋歲時奠瘞祥慶是徵民無札癘嘉薦明粢芬芳式備登茲樓以清眺兮抗仙掌之千尺烟分霧繞霞舒雲積二華藏英莫之能敵九華斂秀攬之失色上有人兮永懷慨先人之敝廬華梁婉其承粉兮重欒屹以綴檀朱華被井麗藻垂疏巡瓊檐以躡步兮思帝子以愁予想神君之游行建雲旒以前驅登寶衢與雲術命含雷使清塗霞爲車兮虹蜺從軒轅兮山之下靈奉轡兮驂車朝吳雲兮暮爲楚雨若方平兮曼

情。挾麻姑與王母。靈風颯其揚塵兮。獵玄蔭而靡丹雘。碧雞羣飛而晝驚兮。疑神君其竝來。俯回軒而四顧兮。有平莽之萋萋。曾光塵之莫覲兮。悵獨寢乎空帷。夢仙家之鉅萬兮。瑤臺矗其峻嶒。赫祥雲之燭日。披赤霧之冥冥。覆明霞之遊館。蔭光碧之殊庭。翳紫桂之神宮。列積金之層城。翠水曾波。碧林被宇。拂珠樹於犀階。植文玉於蘭渚。瓊柯鬱以離立。金根儼其相柱。神獸敷曜於陽林。朱雀流光而來下。亦有五色游龍。青霄玉女。女以守瑤林之桂實。龍以耕芝田之宿莽。飛轡凌煙。羽輪輕舉。或掇碧藕之靈葩。或拾翠鸞之墜羽。葇芙蓉以爲冠。攬霧綃以綴衣。望九靈其如雲。聯霜袍以成帷。挾龍符之靡曼。蔚鳳綬之萎蕤。勒黃金之條脫兮。緼以水碧之藍絲。赤玉之飛舄兮。藉金液之龍芝。揮精之寶劍兮。映碧柰之華滋。忽若靈之在旁兮。雖信似而懷疑。起俯懷而興慨兮。知夢幻之不可期。啓交疏以周覽兮。瞻瓊宙之泝泝。怨翔陽之短景兮。忽委照於西壤。屹玄珉之雲譎兮。繡闥儼以雙敞。山有二石門 竦柏木於玄林。藉芳藥於叢莽。彼草木之無知兮。有橋梓之俯仰。紅翠嚶其載鳴兮。聽璇房之遺音。游鷗兮杉鷄。躍斐尾與與一作紛文。豐狐晝暉於林薄兮。騰猿援木以清吟。羨楚烏之返哺兮。感鳴鶴於江陰。攬萬物以自悲兮。苦愁思之不可任。臨長風以孤嘯兮。明月出於東方。繁星粲其麗天兮。若蘭甸之流霜。情於邑而不寐兮。悵神爽之不可望。慕帝子之承顏兮。從君王以翱翔。曾來歸之未期兮。淚沾襟以浪浪。陳悲歌以下招兮。夜漫漫兮使予心傷。歌曰。燭銀玉菓。璧環光些。雲袂霓裾。不死牀些。瑤壇金闕。光碧堂些。居室之麗。無以方些。碧芝琅菜。扶桑實些。玉酒醴漿。五英液些。風林鳴醋。中華密些。綺饌之腴。莫之能及些。雲裝煙駕。龍迴車些。飛輿八景。

麟胥胥些。上下風雨。翔紫虛些。車服之盛。不知其餘些。綠雲飛觀。中天樹些。四榮翼張。若騫翥些。清房暗列。罌扈布些。雕機朱絲。有竹素些。雖信美兮。非其故些。魂兮歸來。返吾居些。

浦陽朱仲山名其樓曰迎華。以思親也。其先人好神仙云。

蔗菴賦

蔗菴主人挾册兔園。自稱僖父。英詞玉潤。高標鳳翥。恐白雲之寒絕。望青冥而微步。泥金日遠。青陽色故。出處交其懷。窮達干其慮。夕見周公。旦延曹父。夢與時移。迹隨心著。屬荷屋於雕欄。襲宮錦於龍具。畫輪未滅。雞棲在御。忽稅駕乎靈山。值瑤臺之眞侶。登金堂而蔭玉室兮。翳瓊林與珠樹。覺而若失。求之達曙。於是封植成陰。憲寫宮府。銀榜高懸。綠字當戶。琴樽命客。棊槊交午。主人指華榜而謂客曰。此所謂魯之楚宮。而蜀舍之在劉氏也。而豈蔗菴之謂哉。彼蔗菴者。銀臺赤室之流亞。翛然於天地之間。而古今莫之知者也。以爲無有。則吾涉其地矣。曰吾舊游。則子於我乎求之。蓋其在方外也。北倚瓊樓。南屬長離。西接白華。中臨翠水。東望碧霞。下連金地。秦人鞭石而望洋。謝娥入海而增喟。舍鸞車與羽輪。三萬里而渡弱水者。自我始也。若然者。果非夢也耶。吾不得而知之矣。吾將約飛瓊以復來。期芳卿之狎至。夕吾遊乎殊庭。旦歸休乎宇內。優哉游哉。期以卒歲。而人則曰。庶幾佳境之可致也。吾何以榮利爲哉。吁嗟乎。君仙之居兮。瓊壁連楹。浮陰張日。與子之室。爲二爲一乎。綺疏蘭術。金堂玉室。列仙之窟也。子能曳裾彈鋏。以終其身乎。華房曲密。竹書瑤琴。子之室也。亦知安其身。非所以宅其心乎。嗚呼。求諸外。未若求諸己也。安其

身未若修諸身也。奈何蔗漿石蜜，忘搗盞攻苦而受辛耶？天下之佳境，不若是也。蓋出入生死，八極神遊者，方外之佳境，而鄒魯則異。升由之堂，入孔之室者，知之非尊，榮盛大之謂也。嗚呼！及肩之墻兮，吾窺數仞之門兮，吾倚負墻而立者，霧涌雲移，訖不知其中之何似。爰出二物，白犬丹雞，指河以誓。期子境上有進無已，先入其境者，必相爲言之。

閒曠賦 池上小閣

融火向中，余方愼夏。接葉罷亭，依山忘榭。麗草長林，未卜與夜。臨池館水，不怡陰廈。伊清池之蹇淺兮，覺水氣之已多。蔭護草而翳蘭兮，結斯構之峩峩。疏堂屬其南垂，清陰生其四阿。杜余門而卻掃兮，日長往乎滄波。招招緒風，持雲沐露。窮夜爲日，迄于闌暑。余凌波而雅步兮，魚鱗鱗其在下。若停橈之萬斛，當步切之秋浦。朱塵倒景，若閭而飛。疏箔懸繒，五兩萎蕤。燕循檣而失據，鳧就漿而無依。不纜而維，不柁而安。承臚絕後，接舳無前。四載不服，萬夫莫前。亡余楫之蘭桂，廢余橈之芳荃。又若委陋舟而弗御，猶誕寘之河隄也。蔭斯亭以宴處兮，瞻浮榮之翔翥。文謝杏梁，珍慙桂戶。藻離棟而成妍，題去棖而加哢。銀榜昭其碧鏤，皓壁燁以振素。波塵屬跋，雲松薦礎。澤葵生開，蘋花照鑿。浮萍附躡，雕胡承柶。愛芙蓉之婉婉兮，藉初日之明輝。色漱澀於顏間，蔚藻繪之備施。傾蓋成陰，聯袂成帷。含芳揚烈，茹華吐奇。當筵薦綺，在檻成梯。映朱鷺之芳翰，增翠羽之綠姿。鸞鷲在柳，媚蝶時來。爾乃御緞絺，攬蕉荃。肆莞蒨，繚芳蘭。緝靈草以爲躡，緯楚竹以爲冠。白紈微舉，芳風可握。或進壺投矢，投瓊擊博。或從橫竹素，佃漁六學。或左設鷗夷，右操

釣具。蕤苙長拋。箬管不御。屑桂垂芳。聚粒爲茹。投八絲之翠綸。沉百囊之纓罟。於是丹鯉含腴。蓮葍豐甘。葵葉初肥。綠杞闌干。山膚陸毛。華菓具繁。張飲命客。觴政在前。蕉葉無奇。金舳猶窄。折葉薦芳。引筒分碧。挹蘭英之春醪。醜玉薤之芳液。洗慮延歡。祇以永日。雅歌清吹。與舟俱浮。合樽促席。敷衽綢繆。今夕何夕。與子同舟。抱月坐花。藉以蘋蘩。視夜參半。衡漢迴薄。情盤景遽。賓客益落。乃起而爲扣舷之歌。歌曰。世冥冥兮塵汚。人慕前烈兮凌青雲。食有魚兮藪有蕀。願投老兮守丘林。座客聞之。又稱歌曰。卉服兮舟居。荷爲屋兮口爲祛。宿沙子之徒歟。江上丈人之徒歟。

胡氏鐵心亭賦梅亭

太白主人居東海之上。玄虛先生過而問之曰。丈人目視雲漢。志傾金石。淳潔無華。溫慎約敕。獨標樹於當年。守貞度而不易。矯矯兮強懷。夕引冰兮旦而食。槩慕人倫之師表。謂黃金百而非貴。託雲霞之石交。空萬流於海內。思欲起伯夷於九原。與卞隨乎竝世。夫伯夷之徒。固常有於天下矣。子亦有覲於彼者乎。子欲往而從之。敢攘袂而橫議也。主人懼然曰。先生言之。其人爲何。先生不答。操琴而歌曰。若有人兮山之垂。安明節兮久而不墮。願飾巾兮改視。共褰裳而求之。芳猷兮雅道。非夫人兮誰歸。主人未達。從巫陽而筮之。巫陽散策而言曰。曳雪兮牽雲。縞衣兮練裙。傍木兮非溫。草上兮非伸。溫伯雪子之朋徒。列姑射山之神君。託雅故於君子。何頭白兮如新。稜稜兮爾懷。昧昧兮爾言。林中之哲兮。實慰我心。於是朝與客乎同車。夕假道乎陽林。驂旣怠而當休。見遠梅之臨春。于時水介連枝。蘭階玉折。火齊寒生。燭銀焰滅。澗

乎其華燁乎其澤。跨雪懸冰。訖不變色。青女之靈不能威。折丹之淫不能屈。蓋其英風雅操。則楚大夫之遺烈。枯株斷影。則漢黨錮之餘骨。又若顏握拳而透爪。樊飾怒而背裂。雖吳人之木腸。鳳閣之鐵心。猶不足以喻其伉厲清刻也。主人好之。見梅必式。願謂先生曰。客亦知夫江南之佳植乎。觀其勝氣高情。豐規茂德。等契青松。同方紫柏。足於性而無所待兮。曾天損之莫入。增人間之勁氣。殆天縱之遺直。既亘地而垂芳。亦終天而建極。表萬物以雄峙兮。爲奉身之景式。羌信美而非吾徒兮。託年芳而混迹。待伯夷乎未期。獨耿耿於中夕也。先生喟然曰。聖人不作。前言戲之爾。向所稱引。良謂是矣。丈人亦聞其風而惜其識恐當。歟。願白首而同所歸也。爾乃步玉址乎山陽。撫瓊樹以承顏。抽瑜辭兮予誓。左佩華之翩翩。思解交兮春榮。畢殷勤之餘懽。枉光塵兮來下。願無乖於歲寒。於是結游亭於園廬。薄長松之浮陰。文槐翼張。蘭棟流雲。礎花承柱。井藻垂枋。巡簷改樹。當檻移春。聯芳比秀。陰洞連尋。方積雪之時晴。映紅旭之煒煒。蘭芬玉潔。桂郁芝薰。媿三王之珠樹。配二謝之玉人。躋瓊花於賓末。蹴琪樹於下陳。竊獨懷此王度兮。遂永謝於芳鄰。於是易衣改席。賓客狎至。花落金荷。月隨珠履。解腰下之楚芳。撤爐中之綠蕙。彌日信宿。載挹載味。若孟公在座。爲之震起。柱史在周。莫不嚴事。樂君子之得師。慕高世之風軌。舉觴實酒。爲主人壽。乃稱歌曰。世俯仰兮取容。非前哲之所期。君委懷兮崇德。毋表合兮內違。斂春華於茂實。負玉鼎於丹墀。願和飴於百度。安明節於當時。主人聞之。又稱歌曰。洛有花兮江有蓮。閱桃李兮有令顏。懼明德之未崇。日車馳兮莫予翻。蘅蕪襲予衿。夜光生予冠。潔情條兮行葉。終與花兮周旋。

月庭賦 爲朱仲華賦

月庭主人玩世遺榮。放情遠蹈。衣薜荔兮藉蘭。抱明月以長嘯。有遠游子。悼容華之易遷。總名遊之飛轡。歎芳塵之暮起兮。獨伸旦而不寐。秉蘭燭以命客。慕西園之夜遊。按翹袖之豔舞。徵河激之名謳。陳葆階。開翠樓。銀花火合。綠桂光流。驚鬱華之絕軌。疑靈曜之罷馭。未旦忘昏。當宵啓曙。故雖清曜之麗天兮。寧麾謝而弗顧也。於是月庭主人。過詫遠遊子曰。吾聞承雲在御。則靡靡無聲。扶光當晝。則丹良斂跡。伊皓月之明迴兮。託玄夜而顯質。被羣陰之宗光。攬餘暉於日窟。細柳分榮。瓊池增色。麗朔則著象於懸車。薄晦則垂明於中夕。影已缺而玉兔蘇光。質將盈而素蟾散魄。挾天闔以西流。磔地垠而東適。方今若木收華。金樞朗曜。美清夜之虛明。泛寒光於遐眺。煒燭燭其精熒。娟紛紛其縞皓。朗璞藏英。明璣埋照。隋掌增羞。郢握自弔。雞林失簾箔之珍。玄圃隱燭銀之燎。攬海蛤以非奇。豈明苔之足較。又況乎蘭燼之爭華。蜜炬之窮妙也。今吾子謝寒彩於溫懈。蔽明暉於芻幃。是猶忘白日之正中。執隅燭於窈奧也。不識子願從我而遊之乎。遠遊子曰。僕少好紛華。願挹清風。博以殊觀。敢謝發矇。於是歷級尋檐。散步從容。攬予袂之英英兮。若流汞之翻空。飾桂戶以銀鋪兮。易蘭房於雪宮。連門裂帛。在網成琮。紫絲幃兮。丹露寒。翡翠帷兮。碧霜重。照飴飴兮。愛玉階之絳奕。願環堵兮。憐瓊碧之菁葱。邀我乎璇臺。期我乎鶴寢之中。擘金虎之矚實兮。綴瑤光之耿耿。繁星播其華藻兮。巨碧藍之萬頃。若鹿苑之揚輝兮。繞清揚而玉暎。俯孤域而遙睇兮。飛樓觀之離離。若盛姬之璧臺兮。極椒風之麗美。又若銷白銀以爲闕兮。望蓬萊於海涓。影標盤鑑。

光隨句履。寒生貝帶。色動纓鞋。游目郊原。百卉萋萋。被輕容於平楚。鋪白綺於蘭池。水壑兮青蕖。銀泥兮翠藟。佳木偃旌。陰竹揚徽。家藏玉樹。戶列玕琪。悵徘徊以延佇兮。忽棘露之霑衣。愛靈籟之夜生兮。若笙鶴之參差。迺冷然而嘯。浩然而歌。歌曰。明月燭燭。皎以鮮。弱雲無姿。照碧藍。玉衡銀浦。共闌干。良辰急景。促彫年。蕙纒華玉。夜珊瑚。歌長衣袂。風露繁。遠游子聞之。又稱歌曰。珠璧雖明。光一室兮。鳳膏蘭燭。非至質兮。虧盈消長。清光不滅兮。飛龍銜燭。未若茲月兮。清夜漫漫。長歌既絕。螢焰收。銀龍揭。揮瑤琴。操白雪。河傾月落。餘歡未歇。

李夫人賦

李夫人既沒。乙帳成寒。蘭銷曼字。脂澤無華。皇情弗豫。怨反生之不靈。遲所思兮遲莫。願羅綺兮成堆。撫瑤席而不御。熊蹯謝美。露鶴非腴。玉冷柘漿。莖晞丹露。臨扇徵歌。卷衣思舞。縹玉笛兮聲轉悲。璫碧樽兮無與佐。傷寶唾之餘花。恨黃金之莫鑄。於是承明受詔。百靈授職。招錦車。下軒掖。薦浴壺。籍蘭席。羽仗宵陳。侍臣在側。月照金缸。流蘇五色。靈風繞帷。光儀可觀。皇帝撫今懷故。悲喜交集。願謂枚乘曰。陳大夫之麗藻。輸予心之悞抑。緣情率禮。爲予賦之。乘曰。唯唯。若有人兮。望宸幄。行姍姍兮。綬若若。願帳殿之未移。感芳華之榮落。冶步弄姿。映華迴立。形迭成光。綺態豔逸。遠之若綵雲之方興。近之若珠樹之在室。曄曄乎若晴華之依草。娟娟乎若華雪之映日。丹莢竝秀。瓊枝共新。願李增穠。懷芝比潤。髻環百合。香傳五蕝。玉色成丹。長眉入鬢。晞光髮九回之膏。承露華百英之粉。希蛾染桂。傅齒編犀。鬢隨衛巧。腰將楚細。豔與

華兮爭春。目橫波兮剪水。昔宴墮以爲虞兮。今□□夫衆媚。方鸞鍛翮。當蕙罹霜。且溫室之背秋。夕露寒之迎涼。飈車無羽。漢津無梁。苔痕暗上黃金印。綠塵飛墮合歡床。顧今夕爲何夕兮。共珠璧之夜光。翹分翠羽。衣縷鴛鴦。條達如縈。雜佩截肪。綴石榴之華鈿兮。垂傅珥之明璫。曳翠雲之華桂兮。襲鬱金之羅裳。委芙蓉之裙衩兮。緝繁繡之裾諸衣。金錯之襜褕兮。曜細綺之襜褕。揚衡微笑。宛轉躊躇。懷華萼之連枝兮。非直以悅己之故也。寧趣死而不一見兮。有不死之具也。姿采如新。穠華如故。乍見乍泯。出有入無。望椒塗而不進。旋卻立而引去。冀芳訊之一陳兮。蓄瑜辭而不吐。朝爲終南之雲。暮爲渭川之雨。瑜珥在几。茵馮在車。芬若木寒。薇帳在華。翰有點蛾之綠。奩餘漬粉之瓜。情脈脈而不一言兮。紛瓊瑰之盈懷。昔爲琴上之琅玕。今爲空中之玉釵。君心無所終薄兮。使春帶之轉除。乘鸞有侶。拾翠有儔。招漢女於璇淵。命洛妃於春洲。攜玉姜以竝來。挾綠華以共游。上可以據君王之邑邑。下可以致芳意之綢繆。何忽來而獨往兮。使鶩望以增愁。色似是而情非兮。曾不肯乎少休。同車之子。豔非世有。曼姬在左。白台在右。協律悲歌而撫節兮。悅慶雲之光覆。美人一去而長存兮。何必攀攀以爲己憂也。美人笑夫春華兮。春華謂非吾偶。彩雲一散而無質兮。華一去而莫予留。美人死而不死兮。華見之而懷羞。歌曰。陳寶衣兮散璠燭。君不來兮輪兩角。間何闊兮去何速。誰與來兮兩鴻鵠。雄髮春春綠轉銷。秋塵日暗黃金屋。君王愛玉體。無使沈心曲。帝又歌曰。絳縷銷兮百子池。蛾影散兮明鏡飛。日昧昧兮損容輝。來如雨兮青蛾眉。光塵莫予羈。異香出子衣。心悅子兮非令姿。懷故心兮勞望思。何姍姍兮其來遲。折蘅蕪兮復來歸。於是司馬大夫起。

而爲亂。亂曰。罷回波兮停白雪。朝華薦兮玉枝折。玉旣折兮汗未晞。望美人兮青雲霓。斷夢殘香翡翠帷。茗華玉上餘芳字。海外殊庭未可期。更待承華青鳥至。

迎華觀瑞蓮賦

銀谷山人秋食蜚英夏居荷屋。瞰玄林。蔭珍木。援風枝。依露竹。解佩薦蘭。分流互綠。繞蝶圍蜂。量花以谷。愛萬物之光輝。遲丹榮之綺褥。於是鬱金在柳。丹入春荑。冶葉倡條。凌亂紛披。縹帶丹膚。雪骨霜蕤。染金稜以爲碧。添膩紫之紅滋。亦有蟠桃湘梅。碧柰楞梨。購玉蕊於三秦。來王戎於月氏。分朝冢之藥樹。進百越之扶荔。出平泉之鮮藻。致玉李於琳園。靈瓜兮崆峒。紫杏兮三玄。又有冥海如瓜之棗。崑崙百子之蓮。銀桃碧藕。朱梅玉蘭。英蕤纂纂。豔實酣酣。春透餘胥。落藥闌干。歎薜英之歸華。翫朝花之小蓓。於是如微子過而咻之。出瑞應之圖而謂之曰。子能致名花美石。而不能植朱草與金芝。人能致嘉蓮瑞木。而不能使生於林池。子獨不見昔者淮陽金帶之園。今海右芙蓉之嘉瑞乎。觀其庭闈清峻。淥水涵虛。公侯至止。靈苗日敷。自公銷夏。翠綠丹朱。飛鳧爲之拂舞。朱鳥爲之翔翥。藻縟相輝。風翔雨儷。外之則素質流丹。垂葩接附。內之則紅銷白越。鬚聯齊縷。金粟在鎔。脂澤迎露。玉琢相思之心。包約流黃之素。聯珠微漲。金膏如汚。花房旦開。天香微度。莖裊銀篁之管。陰聯翠羽之帷。綵雲墜。則宓妃游女之淩波。雨勢酣。則優人索寒之浣水。至其魚浮積翠。日在蘭芷。又若秦王懸鏡而色動。樊劉唾盤而成鯉。披叢凝睇。連芳具美。弱鬢雙縮。金枝對起。若嬋與娟兮方駕。英與皇兮倚竹。又若女同居兮蘭心。禽宛頸兮河曲。朱鷺將飛而目成。

媚蝶接影而相逐。罷單鵠寡鳧之奏。辭別鶴孤鸞之曲。連雙禽於一縱。配繁弦之雙鵠。寶勝擬之而翻飛。鏤鄒繼之而來復。相逢之樂成聲。聯臂之歌和續。豈比夫東百勞而西燕背。面傷春而獨宿者哉。觀乎氣韻生動。一花二妙。晞金澱以飄丹。出公侯之池沼。此非地產。是謂天造。造不自天。自帝有詔。蓋盛德大業之在。公物莫掩其光耀。而英華外發。從公所到。故奉詔朔方。則見之朔方。命之十道。則見之十道。問之花神而莫余知。索之主林而莫之効。香繞洞玄之天。而赤松攬其餘照。是豈人間之香豔。吳兒之花草也耶。山人曰。吾聞德之厚者無薄發。占其源者視其委。蕃釐作合於三神。觀禎何有於東龜。蓋兼而兩者。蕭曹之將相。實連錢者。王謝之子弟。藹薰胥以爲祥。無但以花木視之也。於是緒言未既。民有歌于途者曰。水花兮。葦葢。祥風兮。佳氣。非動非植兮。從公而至。藕方舟兮。不足爲其廣遠。花百尺兮。不足盡其巨麗。抑南枝出于東海之上。而北枝出于鳳凰之池者耶。山人悅之。使反之。而和之曰。桑麻靡曼兮。禾黍蒙蒙。吏清素兮。年屢豐。民食其實兮。春華在躬。抑袁宏謝安石之仁風歟。沈隱侯之春風歟。

垂絲海棠賦

幼余愛此春華兮。閱草木之文章。左光車而右服馬兮。飲余菲而食余芳。于時青氣流輝。榮生佳植。天集累巧。雨標五色。抽神緘與鬼祕。宛葩剗而萼刻。沃紫淳紅。抽黃淩白。比秀推榮。莫之省識。惟春皇之盡藝兮。有海上之名姿。方梅蔭之雨別。屬杏豔之雲垂。被春澤以成光兮。表獨立而大奇。於是羣芳沮廢。不知所營。桃傷李仆。讓爲先登。雖體裁么靡。而態有餘榮。麗不廢清。纖不傷陋。芙蓉表丈。洛花盈斗。桂華明密。

山樊孤瘦。清不掩纖。穠傷豐茂。穠纖失度。度一作中茲花則否。花必待族。共氣分榮。取萼紅梨。借跗山櫻。儷美
聯芳。爲花之選。未若他花。解手背面。鄭綿染色。魏花薦紫。來禽木瓜。擬之非是。伊瀨河之佳植。信羣離而
類絕。丹徒芳裔。名均種別。宣華麗質。風馬不接。蓋其爲狀也。蘭秀同柔。蕙華並弱。委藍絲而綴。藹垂形紛
而點。臺若四體之無骨。雖匍匐於秦臺。頭搶地而不舉。遷對吏以增愕。始而望之。則輝鄰珠樹。色比紫烟。
非雲等潤。甘露均繁。若處子之穎秀兮。方春睡之爛熳。挾春嬌而無力兮。色鞞鞞其可餐。其少進也。春透
細枝。芳苞微解。秀外朱融。黃中金赭。黼藻林池。金玉芳榭。爾乃湛酒瀾殺。徘徊清夜。紅粧翠袂。效奇樽下。
香口入座。桂燭流華。播明安於蜜焰。同夜笑於缸花。時乃操觚成詠。醉墨垂葩。才華比秀。緝旨同媠。及夫
紅芳滿國。香雨轉繁。扶玉闌而欲壓。傷桃李之盛年。方玉啼之承臉。又媠然而破涕。酒色未消。玉色微起。
故月新白。朝改夕異。歎解攜之無幾兮。恐雲散而風流。忽墮環而遺帶兮。遡風簾而竝遊。曾青陽之未艾
兮。怨花時之未暮。吾方尙友於名芳兮。又遽先於朝露。羣花紛其啼笑兮。歲後口其偕人。雖不言之桃李
兮。猶暗擲於春心。緊明豔之藻質兮。將感勾吳而靡楚君。何茲花之絕俗兮。甘與蝴蝶而同夢。起拂衣而
高謝兮。羞與悅己以爲容。朝吾遊於平林兮。見丹鉛之滿地。雖壯夫其猶扼腕兮。鑄黃金以爲淚。忽百端
之交集兮。折遺榮以搔首。歎光塵之阻奉兮。臨春風而舉酒。指朱鳥以爲期兮。致芳情之扣扣。於是徘徊
起儷。以爲迎繁送謝之歌。歌曰。歸華落兮丹秀分。轉穠豔兮清路塵。委春事於蔓草。將奈何兮愁傷人。座
客聞之。又續而爲迎繁送謝之歌曰。景已絕兮迹已徂。問花事兮無有餘。雖舞袖之翩翩。幸歲期之未渝。

思投分兮寄非仙。無遲子兮長愁予。嗟周親與狎友。髮易華兮歲易除。朝榮暮已悴兮保金石軀。

臥褥香爐賦

廣宵宴於上春兮。蛾眉紛其狎坐。錦隨舞散。引連吹罷。歌殘綠玉之盃。笙煖茱萸之火。月轉華房。缸花暗墮。芳襟微解。男錢半妥。衾聯罽畫。褥飲紫霓。絳螭蚺。英藥紛披。連溫帳之屈膝。卷華幔之參差。空翠忽其滿堂兮。隻衆芳之菲菲。若蘅薇薦芬。沈榆効質。又若龍腦在燔。丹螺獻甲。漢壁捐椒。楚芳委楫。奪藉蘭之蒸薰。醒醉花之病葉。博山倚席。茵菖生寒。薔薇百濯。豆蔻湯乾。香從何來。來無定源。藻綉叢中。不火而然。香生弱縷。五色非煙。援衾拂席。銀黃可鑑。動如丸走。止與輪停。觸鈿函而不轉。環綬筥以如縈。拂綺襦而緩引。當白澤以留行。左右周旋。芳塵不驚。金燼無迹。芝印長存。花將銀縷。鬢隨金校。么鳳低回。繆龍夭矯。鈿花爭麗。雀翹分藻。映紅玉之春嬌。共瓊枝之晨照。晝隔卻寒之簾。夜近綠衣之鳥。寒依熊席。溫隨犀簾。初辭露竹之几。旋遲五明之扇。共君合歡之繡被。藉君象床之羅薦。外惡方以玩世兮。中石心之不轉。均茵蓆而莫吾知兮。謂芳心其如面。內仁外義。千載金言。彌動彌靜。聖哲所敦。願以小人之腹。爲君子之心。

瑋瑁賦

繫鴻濛之散英兮。滋百昌於南紀。逸靈海之於廓兮。涵衆珍之靡靡。其廣無垠。其遐無涖。日月之所亘。四極之所被。裸壤藉其涯。冰天薄其滋。若夫蠻畿羌笮。烏荒象卉。莫不遐舉而兼攬也。於是沸脣椎髻之徒。

狼戾戎蛋之裔。挾浮環以亂流。摻霜綸與桂餌。結精鋌以爲網。控三翼之雲駛。檝爲馬兮舟爲車。陋玄洲與渠子。披淵剔藪。窮珍盡奇。迴輪頓繳。傾于南垂。磔明月於珠蟻。擷貞球於文魮。刊珠樹之靈柯。舉火齊之夕暉。剗冰紈於潛魚。脫奇舸於明犀。迺有鴻商富賈。鉅千之資。載猴舁糗。據險乘危。徵榜人。命水師。披瘴雲。櫛炎颶。涉瓊林。走麻離。厭西棚。瞰吉慈。陵厲三韓。出沒流眉。絕訶陵與林邑。歷麻蘭與勿斯。投鬼關而徑度。迫海童而遵蹊。則有罟師奏美。蘆人効奇。囊琛航貝。轉于京畿。不踵而躡。不翻而飛。紛綸奪視。翠粲填哆。天琛水異。霧委星離。雖仲宣之博雅。張華之析微。知崇文鼠。辯洽碧雞。固莫能悉察而周知也。客有遘歸艗於番禺。得文龜以遺余。驗神物於幽徑。實瑤光之所據。上規圓覆。下準方輿。龍脰宛宛。山覆亾紆。中跼絕甲。或闔或舒。鬱承弁兮峴粹。矯反倪兮金鋪。緣純被藻。繞脅垂紉。冒彤紋而綴黝。披皓璞以含黃。故其翹翼凌亂。隆麗清靚。則異文豹餽。侍殿防也。繁綜紛紜。彤融文璘。則湘靈凝涕。被叢篁也。遠而視之。若赤瑕雜襲。照璧璫。迫而察之。若紫貝駁筦。被龍堂。儷鼉鼉而方華。混餘眊而比瑜。瓊蚌鸚螺。碧鮓丹魚。方斯蔑如也。或遺殼於珊瑚之叢。或命羣於雲精之瀦。若夫鯨鯢絡鱗。鱗鯨鯢鱗。鯨鯢鱗。鯨鯢鱗。鯨鯢鱗。莫不投吻委骨。接景流腴。至若赤水安流。丹涯罷潮。沈駭森於窮髮。晞扶光於沃焦。斂璇臺於蜃氣。結戎鹽於翠條。接余含榮。虞蓼垂蘇。彫蓬鬱遏。游龍森箭。石蘊肉而吐華。鮭隱甲而生苗。魁祿含漿。委其滴。羸蝓蟻蠹。填其坳。爾乃登珠澤。薄無皐。麟水英。獵神蕪。喋海藻之彫葩。蔭靈茆之綠苞。出碧津之方羊。涉瓊田而逍遙。啞血飛涎。卷殼含膏。於是豫且構網。盧亭進爵。獠市掄材。海人薦骨。解甲剗腸。刮箆醜血。哲夫

准量良工辨質。或擬通犀而鑲梳。希粵象以爲櫛。綴簪珥之燐亂。糝靈釵之豔逸。壓唐妃之義髻。鑑夏姬之光髮。虎脾斂姿。宛珠罷潔。精逾玉燕。價傾寶葉。顧三珠而未奇。豈九鶴之能奪。委質而嫫母含榮。潛輝則楊文豔滅。恥借暎於金苔。謝浮光於海蛤。或青殿授妃。桂宮御服。緇華摘之陸離。構寶臺之采緝。尊別魚須。飾隆荆玉。制備輦綸。禮均展鞠。乍金炯之辭奩。方紫珍之在御。翠氣菱苕。素華月鶯。影麗雲承。葩垂萼跗。被玉水之餘滋。藉金膏之微汚。或攜華神屋。効質望仙。綰寶帳於靈臺。雜明璣以押簾。錯以金機。照以玉茵。芳苒內朗。丹髓外燧。火齊牀明。鬱相蕩。珊瑚窻近。青連錢。彼僂句與大蔡。雖殊用而同體。爲王國之大寶兮。顧何辭於三疊。羌殺身而無補兮。合瓌貝以爲靡。翳巾笥於廟庭兮。豈神龜之可比。幸寄身於齋房兮。脫微生於泥滓。徵朱鱗以療飢。委丹粟以爲餌。或潛跡於金沙。或揚波於翠水。渺瀛海之東被兮。吞百川之輸委。且吾投於清流兮。夕振蕩於海尾。苟未忘於反身兮。豈沉光於沼沚。

庭下有龜。白質而黑章。豐上而折跗。或曰是瑋瑁之屬也。作瑋瑁賦。

放螢賦

薰草暮。溽暑除。皇歡洽。清夜徂。命合宮。侍燕胥。出紫房。背椒除。金吾輟警。鳳燭成行。渴兔洒塵。飛蓋飄揚。萍駕神移。椒蘭夕香。千衛百騎。乘堅驅良。左駿驤。右步光。幸帳殿。臨鞠場。離宮榮觀。息宴無方。易牙割烹。儀狄挹漿。蘭馥如陵。桂酒如江。鶴漏向丙。宸賞未央。皇帝惡丹燭之易銷。惜照車之未遠。顧碧珪之鮮曜。恨金苔之焰短。明月罷懸。夜光不展。怨白鳳之不來。慕燭龍之遠攬。乃有黃門持囊。園吏荷囊。挾丹鳥。馳

乘黃。於是綠水罷歌。豔舞離床。循桂道。出蘭堂。步神臯。歷重岡。比竹無聲。蓄軫山陽。門燎轉遙。圍燭收光。裂囊解橐。從風直上。亘地彌天。光焰百丈。聯輝接豔。互滅齊明。魏璞分華。漢井疏榮。玫瑰奪燄。火玉辭榮。白虹貫月。列火爲城。齊連枝之鏡樹。配照夜之金精。鞞鞞酣酣。前後千乘。熏夕幽玄。萬象具彰。所覲維何。人間天仗。華旗孔蓋。金瓌琳琅。犀羈龍勒。綉鞅玉瓊。瑤鸞搖裔。飛屑焜煌。文茵毳幙。風動帷裳。立馬如龍。執戟如霜。女騎聯鑣。金碧相望。巾幘輕明。微見花房。髮列四枝。釵分三子。華珪瓊帶。光連鞶帨。紺袖分明。碧唾花裙。袂猶殘紫海。水於是乍離乍合。將留復去。繞雉扇而如縈。綴流蘇而欲舞。映橫帶之萬釘。耀盈腰之三組。拂瓊弁而懸纓。投羽衣而及屨。思拔貂而遽脫。已入懷而徑度。桃驂振迅。皇駭驚疑。金盤陔兮。照衣青腰。裏兮頻嘶。鵠鷓忘明。雞人輟晷。顧鳩鵲之失枝。誤宮鴉之亂起。於是離宮傳燭。乘輿言旋。鶴籥夜開。入宮下輦。餘燿未畢。影娥零亂。戶挾露囊。人操紈扇。金屋遲明。銀床拾焰。帝乃乘宮車。臨臍殿。工登歌。御三飯。傳盃受簡。以命絳仙。吳姬再拜而言曰。丘園弱息。草萊餘燼。周旋蘭掖。出入椒闈。待詔後車。策名清禁。沐浴春陽。天慈光被。榮添楚豔。恭逢漢侈。近君王之密坐。思捐褶兮燔翳。同明璫之在掌。方契刀之處囊。非孤遠之有耀。被天子之清光。恐煙宵之失路。委蔓草之荒涼。願回霜而收露。幸長近於太陽。乃作歌曰。赫赫皇暮。赤精子。瀉汭化成光。萬世銀缸未冷。戒鳴雞。幾度金苔委丹地。綺錢青鎖進疏囊。堯禹世人同寸晷。長秋宮中涎涎尾。漢以火炎鳥用水。於是皇帝作歌。綢繆宛轉。謂侯夫人起而爲亂。亂曰。天威輝耀。景化行。英姿四照。宣皇明。紫脫華秀。泰階平。百王仰鏡。萬世榮。螢盞增輝。若木英。光啓玉度。垂休

聲。帝乃歌曰。舞玉梢兮歌發梁。歌倚瑟兮行羽觴。龍腦烟寒五成帳。玉華零落珊瑚床。愛丹鳥兮往來照。禴組兮繁縟。光華夜繞瓊樹枝。莫向璿宮妒銀燭。長門懸月照阿嬌。共聽天子無愁曲。六宮聞之皆稱萬歲。

節婦賦 建寧吳家

世忽不踐兮。情靡薄於魯縞。狹節性而賤名檢兮。誰與守志而厲操。侵欲崇侈兮。毀信棄忠。銜玉賈石兮。智力以爲雄。傲明德以掩義兮。當官以放濁爲通。衆竊步而翳行兮。爲名教之所容。玩細娛於一旦兮。亂前修之風度。雌黃落而唇亡兮。曾冰鑑之不可睹。鬚髯蔚其如戟兮。有遺憾於古之烈女。彼釋生而取義兮。彤管列於竹書。榮曜赫其相宣兮。爲百世之楷模。夫何末流之不競兮。蘭蕙化而爲芻。謂人各有偶兮。傷未亡而獨居。思來日之苦長。惜華年之未渝。獨竦踊以待旦。願長處乎脂腴。語刺刺其猶在兮。遂捐棄如脫遺。雲泥忽其異迹兮。運環解而缺離。槿花以爲心兮。曾何足以平高臺。與曲池。孰不悅其春華兮。于秋實之不可期。世靡靡而不反兮。時所廢其莫支。士無以美七尺之軀兮。夫烏責乎房帷。揚五教以經邦兮。慨淳風之永息。傷露竹之無筠。惡丹青之改色。嗣潛德之孤光。夫烏覩乎人倫之幅尺。于閩越之深阻兮。有當代之女英。懷鐵石之深衷兮。配玉壺之清冰。殆天授之以勁節兮。左貞姬而右陶嬰。宜受祐于天朝。崇里巷之休聲。主君邈然而深思兮。曰予何德以辱邦君之嘉命。予辭家而來歸兮。遭夫子之不幸。願諸雛之煢煢兮。于附翼之未成。思奉身而遠引兮。託孤雛於飄鷹。予敢辱先人之教兮。以一身而事二姓。

願酒掃於地下兮。知待終以爲榮。斯女子之檢狎兮。非進脩之行也。衆好名以矜賢兮。固昔人之深恥。旣相吻以簠簋兮。又相覲以徽懿。飾浮華以爲己目兮。每發背以霑衣。黃流蕩而稽天兮。引一九以障之。取燐火以待明兮。謂朝露之繭可以爲衣。振一羽之毛兮。舉黃鵠乎千里。張兔置于芳林兮。夫烏取乎虎兕。與熊羆無妾等百數兮。夫何闕於今之世。顧皇極之不立兮。是烏足爲經遠之計也。夫婦人之行不表于當世兮。況處常而待終。以榮名爲不祥兮。猶足以繼古烈女之芳風。系曰。金薤繁兮。白露未晞。履聲絕兮。庭有綠滋。幽夢徘徊兮。碧瑤樹。黛光零落兮。青蛾眉。努力兮。自愛。淳風兮。可期。

鹿皮子集卷之二

樂府

中秋月

銀漢西流烏接翼。回首人間化爲碧。瑤臺月裏可避胡。三郎錯路歸魚鳧。霓裳月裏親偷得。卻恠李暮偷壓笛。

寒食詞

綿上火攻山鬼哭。霜華夜入桃花鬻。重湖煙柳高插天。猶是咸淳賜火烟。

行路難

寒韃取流蘇。流蘇不解連環解。離情別思出君懷。教人枉結流蘇帶。作書報天孫。河翻浪動七香車。折伊蘭兮捐艾蕭。伊蘭化作榛中草。美盼何須比目魚。六翮安用頻伽鳥。文鴛宛頸奈枝連。不如見月生羽翰。

虞美人草詞

美人不願顏如花。願爲霜草逢春華。漢壁楚歌連夜起。騷不逝兮奈爾何。鴻門劍戟帳下舞。美人忍淚聽楚歌。楚歌入漢美人死。不見宮中有人處。

七夕宮詞

內人拜月金鋪戶。鳳宿梧枝秋葉下。露華入袂玉階寒。織署錦工催祭杼。月下金鈿照骨明。同心絲綉紅生縷。素瓜碧寶上華樓。夜闌飄馭下銀州。

雁來紅

東朝一書成百戰。上林一書旌節返。誰傳驕子一函書。人不如禽知慮遠。自從燕滅秦晉亡。是非直到空中雁。蘇郎寒絕雁來紅。腳下胡姬殘綵線。願燕在北秦在西。雁去雁來無是非。

五言古詩

清隱亭

白日照陽春。九陌揚遠塵。往來酣蟻戰。誰是投閑人。人生苟知足。政復貴隱淪。萬事等大夢。汨沒徒艱辛。所以賢達士。不肯勞其神。結亭林泉間。歸來養清真。牕虛野鳥狎。樹密山猿馴。草色上階秀。花枝倚檻新。俛仰有佳趣。樽酒時相親。終然遠塵俗。不愧無懷民。

雨香亭

花香不因雨。雨過花更香。氛氳入几席。馥郁侵衣裳。恍疑燕沉水。輕煙逐風揚。此時鼻觀通。百慮都已忘。願攜白玉盃。掇英挹天漿。灌沐紫金丹。卯酉滋芬芳。服食養精魄。一息三千霜。絕勝仙人掌。灑氣凝秋涼。

悅心亭

清晨攬衣起。感物暢我情。春風從何來。草木忽已榮。深池躍游鱗。喬木遷鳴鶯。俯仰極萬類。氣機足生生。

哲人貴冥會。悠然竟何營。此□□具述。酒至且復傾。

答李齊賢言別

古來青雲士。論德不論年。及時揚意氣。車服耀且鮮。譬彼桃李花。逢春各爭妍。胡能學蘭菊。遲暮秋風前。羨子富年華。文思如湧泉。詞場早騰譽。海內推英賢。而我竟何爲。著鞭苦不先。賦命有遲速。行止任自然。吾觀鴻鵠飛。低迴未須憐。會當振六翮。高舉摩青天。

題松澗圖

鬱鬱澗上松。磊磊澗中石。石泉有餘韻。松枝有餘色。高人事幽討。結廬此栖息。欹枕聽潺湲。開軒盼空碧。俯仰欣有契。足以揭昕夕。我亦厭塵囂。久焉慕岑寂。他年倘相過。勿謂予生客。

送李仲積北上

圖名當入朝。圖利當入市。丘壑多賤貧。胡爲久留此。入市不圖利。入朝不圖名。不如丘壑間。逍遙抗高情。白日從東來。忽焉向西沒。急景易蹉跎。紅顏坐消歇。鼎鼎百年內。已過四十春。借問百年老。能有幾何人。縱使創還丹。可以長不老。志士惜分陰。立身亦不早。回首望堂上。慈親雙鬢皤。得祿奉榮養。其如遲暮何。絕裾固無取。負米良足美。遠離膝下去。豈比蕩游子。嶷嶷黃金臺。鳳詔求賢材。君行會有遇。名成早歸來。

把酒

把酒勸白日。日車邈難攀。朝來出東海。薄暮沉西山。東西若循環。來去無時閑。何如延光景。使人駐朱顏。

題鄭仲潛東明山鑿池曰靈淵

鑿池得清泉。泉清乃見天。寧知天可見。有自未鑿前。池泉一何靜。天體一何玄。仰視天廣覆。俯察天在淵。俯仰倏上下。孰得知其然。至人有真見。不滯方若圓。百慮本一致。萬殊同一原。淵淵與浩浩。信匪言可宣。天運妙不息。君子貴乾乾。孔聖有明訓。請子觀逝川。

送吉夫北上

之子冰雪姿。冥心學仙真。官卑且勿念。況復憂其貧。邇來太白山。山勢凌秋旻。雲盡月照夜。花開鳥鳴晨。閒居少公事。猿鶴爲比鄰。採芝過林麓。釣魚遊水濱。七年不得調。幽興如逸民。通塞任物理。聊用安此身。憶昔始相識。交情日相親。問君鍊藥說。祕之不肯陳。金液且莫採。何以製水銀。豈伊蓬萊中。無分追後塵。君今別我去。九關朝帝宸。功名信可就。慎勿煩精神。閱風青峩峩。海波白粼粼。他年重會面。笑盼桃華春。

雙柏題畫

亭亭山上柏。柯榦如青銅。蒼古拔俗姿。肯作兒女容。風霜日搖落。萬木爲之空。爾獨不見摧。屹立如老翁。乃知歸根妙。生意恆內融。願乘雷雨興。化作雙飛龍。

蘭竹

幽蘭生石間。隨風播芳馨。埋沒荆榛叢。獨自全吾貞。南坡有新竹。其葉何青青。居然得所托。樂爾君子名。

瓊林臺

上清瓊林臺。似有千仞崇。琪樹交柯生。瑤草亦成叢。幻境類玄圃。凝輝接琳宮。天花或時墮。縈紆颺迴風。仙人薛玄卿。手持玉芙蓉。傲睨八極表。洞見萬象空。飛書約王子。弭節延赤松。步虛朗歌詠。流響入雲中。

樵隱圖二首

清晨執柯出。負薪薄暮歸。豈無登頓勞。獨與憂患違。山深雲冉冉。樹密芳菲菲。猿鳥久相狎。世事俱忘機。買臣昔採薪。頗似遠名利。何事五十年。卻復懷富貴。古來樵牧間。多非隱淪地。寄言謝君子。無使心迹異。

送兄遊姑蘇

浮雲渺天末。隨風恣悠揚。遊子四方志。去去道路長。手中三尺琴。朱絲汎宮商。但恐和者寡。使我心增傷。寒風變衰草。原野正蕭條。馬嘶人影亂。落日在樹梢。姑蘇四百里。未憚跋涉勞。遙知黃鶴舉。六翮凌雲霄。

送蘇吉甫館於穆千戶家歸

先生來東陽。已是一載餘。深居謝賓客。閉戶只讀書。青燈夜檠短。黃卷秋堂虛。伊吾不知倦。經傳爲菑畬。玉階未投足。侯門姑曳裾。枚乘終顯達。馬周豈迂疎。願言崇令德。努力無躊躇。他年二三策。待詔當公車。

胡伯玉隱趣園四首

朝看花中仙。顏色媚且鮮。暮看花中仙。顏色忽已薦。紅芳不足恃。青春政堪憐。人生宇宙中。壽無金石堅。百歲等瞬息。業火徒熬煎。何如鍊金液。返本得長年。

秋菊有佳色。幽香知爲誰。蔚爲霜中傑。肯向露下衰。獨賞心悠然。酒至觴淋漓。永懷陶靖節。高風邈難追。

夕隕悲蕪華。秋零悼蒲柳。急景不可留。高風邈難久。風霜十二月。松竹凋獨後。還與嶺上梅。結爲歲寒友。草木本無情。猶能同歲寒。奈何市井交。輕薄不足觀。脩竹蔭幽澗。築亭留隱君。隱君去已久。何人躡清芬。撫弦變新聲。感慨萬古情。不識壻玉潤。不識翁冰清。煙林暮蕭蕭。風木秋泠泠。故交難再得。兀然空舊亭。

同陳子俊暮秋遊耆閣山時九日後

節季日月淺。山川凋落繁。志士惜遲暮。事念慮端。同遊得佳士。散懷遂躋攀。摠摠萬夫內。迺有吾子賢。英特奇偉姿。筆精語亦溫。暫遠欣已遇。當憂亦爲歡。步履得古寺。入室清心源。草枯石色出。層構陰崖緣。猛虎昔夜吼。發石存幽泉。至今連筒飲。頗厭井汲艱。佳節去我久。黃花有餘妍。惜惜夕鐘罷。草草尊酒殘。客子已山際。落日猶樹巔。舉世塵漠漠。朗咏山中篇。

七言古詩 長短句

宣和滕奉使茂實 縣人

鷓鴣綠少年。驕不舞。大梁花石春無主。天與遼人十四州。四海九州非漢土。漢使相看墮節旄。烏鳥黑頭羝不乳。舊時別贈楊柳枝。插向雲中今十圍。

蘇李泣別圖

祁連山下空卷折。啼鳥入夢頭如雪。胡越相看十九年。今日輸心爲君說。窮兵未必來遠人。居□謀□□

可馴。天驕萬里來稱臣。他年陛下知臣心。

送厲生之天台

劉郎洞前藥草肥。年年送春春不歸。劉郎採藥路不迷。路迷卻是還家時。人間藥盡採者稀。醫師採藥歸未遲。終南捷徑莫西去。正在劉郎路迷處。

贈拆字蔡生

至順三年苦寒月。梅花不拆梅樹拆。今日蔡家簾口前。字字拆作風花裂。書生貧病字撐腸。識字不識養字方。字字拆來方可養。養作吳中菰飯香。我今林居交木石。妖祥禍福無留跡。六畫吐盡一畫無。豈復有字從君拆。古人作字留世間。因君破碎斷復聯。此術若在造字年。未成已拆何能傳。

寒江漁樂圖

菰蘆滿眼沙際天。寒林古樹凝蒼煙。長河不是天上來。懸河袞袞生筆端。魚龍半隨風雨去。舟人漁子空茫然。畫師胸中吞萬有。吐出雲夢常八九。

和楊廉夫買妾歌

劉郎持玉笛。再入天台山。天台兒女不相見。採藥直入桃花源。劉郎吹笛花能言。雲離雨別三千年。青矚橫波髮鮮碧。藍紅染作天桃色。劉郎今姓楊。相逢便相識。金條脫。龍縞衣。鸞車木鳳凰。飛下錢山西。舊桃拂面丹如雨。紅蝶黃鸞解歌舞。桃源無路入人間。一身金翠來何許。玉山子。莫將迎。方平會麻姑。參語無

蔡經。飛仙不入風沙地。無端夜過昆山市。三滌腸。三洗髓。絳雪玄霜玉池水。

代嘲舊人

吳王臺前天地老。羊家吹笛煙花繞。羊郎到老不識顰。昨日西施顰更好。妾行自縮春風髻。姊送出門車。在道塗金兩袖石麒麟。姊唾乾時碧如草。唾花一夜滿妾身。云是背後淖夫人。

代答新人

妾來詠柳三月初。美人未字揚柳枯。美人脈脈金芙蓉。不泣前魚傷後魚。阿嬌黃金不復餘。白頭曲成銀筆書。曲成未用銀筆書。相如明日刺相如。

代玉山子答

建昌老父吹羌管。背花吹盡風花片。雪中花老花未知。我起開簾納江燕。夏姬出境春爭妍。房老不出金谷園。花奴鼓急人人顛。研光帽滑花難住。

題竹隱軒已下四題爲胡伯玉賦

遶軒脩竹幾百竿。瀟灑迥若仙石壇。黃金瑣碎夜月冷。碧玉蕭瑟秋風寒。道人幽居坐其間。漠然塵紛不可干。勁節攜爲手中杖。散籜裁作頭上冠。市朝富貴多憂患。山林曠蕩聊盤桓。七賢清脩誠足慕。六逸可學夫何難。有時夢見瀛洲仙。鞭笞鸞鳳遊無端。叩頭再拜乞靈藥。使我容貌無凋殘。仙翁贈以九轉丹。服之兩腋生羽翰。逍遙物外有餘樂。何因報我青琅玕。

待月壇

憶昔待月錢唐秋。眼寒桂樹枝相樛。桂枝半蠹花不實。折之不得令人愁。帝鄉幽燕邈吳越。還向山中弄明月。聞道君家待月壇。壇空風露何漫漫。便欲因之遡寥廓。倒騎玉蟾飛廣寒。廣寒宮殿殊清絕。素娥嬋娟皎如雪。笑指桂樹對我言。留取高枝待君折。待君折。須幾時。明年八月會相見。付與天香第一枝。

天香臺

牡丹百本新栽培。紫石爲築天香臺。春風三月花信足。深紅豔紫參差開。五色卿雲色紛郁。九苞舞鳳毛毳毳。也知東皇愛嫵媚。何須羯鼓聲相催。蔗漿初凍瑪瑙盃。酒痕微污玻璃杯。雙成未逐阿母去。弄玉卻伴蕭仙回。還憶唐家天寶時。沉香亭北君王來。霓旌翠節導雕輦。繡帷綺幄圍香埃。倚欄只許妃子並。徵歌或詔詞臣陪。陳迹如今安在哉。風雨滿地唯蒼苔。相傳尙有清平樂。翰林供奉真仙才。

蜀錦屏

先生新辭白玉堂。晴晝衣錦還故鄉。鄉山草木被光耀。化作錦繡呈文章。花神驚視不敢當。此花非我山中芳。初疑寵渥出祕閣。復道榮恩來奉常。雲蒸雨溼春氣重。至今猶自餘天香。願將歸院金蓮炬。移近圍屏照豔粧。

題海棠

東風吹墮細雲影。別院春遲宮漏永。繡幃寶帶綰流蘇。夢入瑤臺呼不醒。熒熒銀燭花蕊多。城頭烏啼奈

曉何。

石溪歌爲石溪和尚作

石溪一滴水。本自明河來。明河倒瀉箕尾溼。千里萬里喧風雷。小龍挾向雲間過。水滑瓢欹誤傾墮。蒼崖一息裂清泉。似是巨靈新擘破。南州衲子天下奇。夜撐餽船欲渡之。珠船照耀明月冷。赤手拾得珊瑚枝。又復揚船向東去。直到衆流歸一處。東方火發海影紅。金烏飛上扶桑曙。

香雪壁

我欲借君香雪之素壁。障予山中玉雪之空亭。亭空壁素了無物。惟見虛白一色洞杳冥。宴坐契元始。忘世兼忘形。嗤彼塵俗人。兩眼那能青。蓬萊之山仙子窟。玉作樓臺銀作闕。豈無瑤草弄朝烟。亦有瓊花迷夜月。羽衣道士乘素鸞。引手招我青雲端。飄然高舉遊八極。下視五嶽烟霧何漫漫。

題騎牛讀書圖

朝看書。騎牛出去日。上初暮看書。騎牛歸來日。欲晡。朝朝暮暮看書卷。還慮牛飢無牧芻。家貧本分辛勤過。平時敢望閑工夫。人生衣食皆有餘。棄之不學將何如。

胡伯玉隱趣園君子池

五月菡萏發。紅粧明綠波。君看池上水。何似若耶多。若耶女兒歌豔歌。輕舟短棹相經過。傾城顏色有人妒。日暮涼風知奈何。

五言絕句

勸兄弟十首

田氏好兄弟。初焉念少差。一朝仍會合。荆樹再開花。
鄰下然其句。淮南布粟歌。相煎容不得。奈爾二人何。
何苦毫釐較。當思手足親。丁鴻與劉愷。讓國是何人。
鴻雁天邊過。脊令原上飛。尋聲還顧影。次序不相違。
父慈子必孝。兄友弟須恭。倘使誠心在。如何不感通。
連牀聽夜雨。長枕共姜衾。棣萼相輝映。何憂外侮侵。
金昆與玉季。和樂奏埙篪。氣象自然別。淳風復古時。
生來同一氣。兄弟是天倫。祇要長和睦。休論富與貧。
友愛言無間。從教耳屬垣。怡愉崇遜讓。寬厚福之源。
古有難兄弟。今無好弟兄。何由風俗厚。凡百近人情。

新涼二首

夜來窗戶涼。一枕聽秋雨。曉起絕飛埃。門前有流水。
雨將殘暑去。風送新涼至。安得歸夢成。長夜愁不寐。

蘆雁四詠飛鳴宿食

肅羽遵寒渚。渡江蘆葉黃。誰云南去遠。不敢過衡陽。
萬里西風急。送書時一聲。從教驚客夢。可待主人烹。
沙汀棲處穩。夜漏有奴看。月暗蘆花白。一身秋夢寒。
飲啄殊自得。水田稻梁秋。寧因謀一飽。失卻網羅憂。

越上寶林寺八首

寶林從何來。飛空錫同住。天風吹海濤。常恐復飛去。
浮圖成再世。業岌高入雲。妙應人天果。鈴音上界聞。
巖穴如深井。滋潤通海脈。靈鰻久蜿蜒。歲事時有獲。
應真曾卓錫。百尺井泉深。汲取天人供。泓澄印佛心。
河涼大布衲。七帝師道德。流傳五百年。未滅針線跡。
鐵鉢生古色。曾經飢胡麻。黃龍此降伏。更長碧蓮花。
佛宮庭宇靜。深翠萬竿竹。忽悟瓦礫聲。香嚴道機熟。
口檀越中秀。軒窗四面山。紅塵飛不到。長共白雲閑。

除夕

今年盡今日，明日是明年。客況蕭條處，春寒雪後天。

題畫叢竹幽禽

露節老愈蒼，煙叢寒更碧。野鳥何處來，點破九秋色。

送李仲積北上

北上京華去，名成幾日歸。春風折楊柳，離思兩依依。

雪景

小舟乘興來，興盡便回棹。夜深雪更深，何須見安道。

七言絕句

雙峴

兩峯削玉倚青天，一水分流碧漢邊。好境直須真見得，莫將圖畫看山川。

送孫仲明尉再到東陽省墓歸太原

游子思親日九回，首丘無計轉堪哀。故人相見休相問，不爲東陽酒好來。
西風老淚斷人腸，滴死墳前草樹荒。明日還家重回首，白雲何處是首陽。

桂

黃金蕊密露華圓，碧玉枝交煙影涼。今日蟾宮親折取，人間無物比天香。

贈馮東邱

一曲鳴琴一局棋。一瓢新酒一編詩。幽齋風月清無限。莫問流年有盛衰。
送人之樂平

鄱湖千里趣行裝。野水閑雲路渺茫。解飾旗亭春色薄。不堪回首憶東陽。

含暉亭

山色空濛翠不如。平湖長遠野人居。湖堤好種垂楊柳。取次持竿索貫魚。
石

拳石當軒玉色寒。雨苔蝕盡鷓鴣斑。也知好事無真見。不看真山看假山。

山水

青山如髻樹如麻。茅屋青帘認酒家。侵曉一番飛雨過。滿川流出碧桃花。

江山萬里圖

生憎李郭畫山川。鑿破鴻濛混沌圓。尺地寸天都剪碎。女媧鍊石是何年。
策蹇衝寒圖

水際行人絕往來。石泉幽樹太清奇。揮毫對客無情意。不似黔驢背上詩。

五言近體

投外憲列職

浙右饒名宦。天潢異衆流。星華婺女分。印薜越城秋。長吏多佳政。流人反故邱。諸郎復爲郡。外憲此優游。爲政歌謠起。論文鬼魅愁。風霜臨外憲。星宿繞東州。身健都忘老。詩清不爲秋。邦人好吟咏。異代見風流。山縣繡衣新。前騶此望塵。霜威重風憲。秋漢候星辰。帷幄多賢士。觚籌託下陳。空懷望旌檠。惆悵浙江春。

投憲幕上下

星驛東州盡。霜威憲府新。古今從上下。經傳獨紛紜。子弟諸王選。丹青寶口親。已知收俊彥。也復惜餘人。廣平新職業。荆楚舊文章。盛府芙蓉幕。諸曹雁鷺行。賓僚嚴分限。官事舉維綱。千里無青草。飢民正可傷。顏巷端居日。膺門屬望初。芙蓉池不遠。桃李地無餘。霜雪歸行幙。星辰近輔車。不才汚盛府。吾子意何如。法曹新政績。憲府舊才賢。下客初傾蓋。東州共拂冠。無才供几案。有術事虛玄。柱下非明習。吾知濟世難。聲名沈書記。廉白杜參軍。千里風期合。三才月旦尊。辭章須爾雅。帷幄厭深文。秋興知多少。黃花酒滿樽。求學鄉人久。爲農歲序更。三秋收橡栗。千里足蓐羹。作吏真癡絕。吟詩得瘦生。諸公能指畫。經訓倘縱橫。

投李息齋父子

盛府聲名獨。龍門地望雄。懷文思憑口。燙刺適爲容。翰墨千年事。風流一世宗。只今天下士。猶幸識元公。膺門桃李陰。蘭砌近清芬。不惜階前地。祇慙俗下文。筆懷蕭協律。才慕沈參軍。鴻雁東南急。飢鳴屬府君。藉甚佳公子。風流絕代無。山中書扇帖。江左折枝圖。名世元暉畫。傳家大令書。登壇如肯授。端欲曳長裾。

送里人都下省觀

郎君向行在海岱莫雲深。王謝金貂系班揚翰墨林。應爲洛下詠莫作越人吟。父子知名後眉山直至今。
送蒙古教授郭受益歸洛陽

正馬金華道西風過雁初。蓴羹千里地菰米九秋餘。齊語傳聲澁巴童問字疎。湯湯清洛水舊學復何如。
徐文蔚挽歌

梅花橋上別見說尙臨池。筆法承中絕名家比盛時。猶傳徐浩體自寫鄭虔詩。已並漁陽帖休看陌上碑。

劉山南挽歌

時儕通貴後六館竟如何。不有東南事終期甲乙科。泮芹吳子邑露薤漢人歌。白社雙林裏西流淚作河。
漢閣文章舊天台草木深。笑談無復日比興有餘音。歷歷傳新作時時見古人。有懷祇短氣何處識長身。

白鸚鵡

開元白鸚鵡一作雪衣女長在玉墀邊。宮樹棲應熟胡書讀未全。音餘西域語夢入廣南天。莫把宮中事儉歸外國傳。

銀谷澗山房

樓臺依水石樹帶疎篁。洞口有靈藥水西無夕陽。天花空處沒春草定中長。芳桂已飛盡有時聞妙香。

送沈教諭

師友淵源正。公卿譽望揚。鄉閭仍未達。世事故堪傷。汗竹秋檠短。羹芹午飯香。祇愁雙鬢髮。容易染清霜。
學舍山雲暗。城樓海氣深。文章初近古。風俗遂如今。冷暑三年客。亨衢萬里心。須君明教法。那得刺青矜。

題鄭氏義門

二老連枝樹。諸郎百子蓮。同心無爾汝。合族到曾玄。化洽文明日。淳還太古年。名門人共羨。家範世應傳。

次周剛善僧房牡丹韻

不擬維摩室。春風步障開。欲分清露濕。故近白雲栽。色奪人間豔。香從天上來。韶華正繁富。啼鴉莫相催。
憶昔仙春館。春時每獨開。公家今賸有。僧舍亦分栽。暖吹扶霞上。卿雲次日來。可人看國豔。卯酒不須催。

春日二首

處處春風滿。東皇信不偏。蘼蕪窮遠目。梅柳共新年。白水暖浮日。碧山晴吐煙。清時多樂事。敢擬卜居篇。
細雨花陰重。青煙草色勻。驚禽長避客。嬌燕卻依人。絃管紅樓酒。輪蹄紫陌塵。東風競遊賞。因想杏園春。

雨四首

山雨紛如織。齋居晝掩門。陸行憂馬滑。船濟怯濤奔。汀草今猶病。園桃故不言。游鱗忘浦激。直到槿籬根。
雲氣朝彌積。濤聲晚更雄。鼉生沉竈下。人入漏天中。稍覺傷生意。深愁誤化工。羲和司叱馭。爲擁日車紅。
風雨今猶惡。誰憐行路難。繁華三月景。牢落一分殘。稚麥應傷澇。嬌花不耐寒。江流方浩浩。雲氣轉漫漫。
楚澤連空闊。吳天極杳冥。水添今日白。山沒向來青。鷗鷺乘原隰。藜蒿翳戶庭。出門知未可。試學衛生經。

送朱明德休寧典史

今日休寧縣。猶駟吏。鞅塵直存。吾道在。清任此生貧。燈火千家夜。桑麻百里春。因君重參贊。民俗竟還淳。吾子仍淹驥。諸公謾薦賢。長材操吏牘。清興寄詩篇。慷慨悲前事。蹉跎惜暮年。于公陰德在。千載尙能傳。

送張仲舉歸晉陽舉進士

籍甚張公子。詞華衆所推。門閭千里望。天地一編詩。花落山公宅。雲寒杵臼祠。看君歸晉日。翻作別家時。世業今誰繼。瑤編自討論。長材歸下吏。吾子好斯文。千里風期合。三才月旦尊。眼中今落落。俗下正紛紛。牽牛在南紀。游子上河梁。殿閣終前席。江湖且下方。州閭無別業。文字有他腸。萬里關西路。秋槐日夜黃。長歌望吳越。不道出無車。明節固所尙。清門難可居。春帆移暮雨。晚飯半江蔬。何地非鄉社。終期返故廬。掛帆謝公浦。把酒闔廬城。江柳不忍折。春風當別行。關雲連楚暗。隴月向吳生。葉落長安道。思君北問程。矯矯凌雲賦。纍纍白雪歌。世人祇謾與。吾子視如何。誰預文章觀。君宜甲乙科。秋闈今獨立。春興未須多。

黃晉卿見過卻歸烏傷

日下新傳詔。江南共濯纓。歲中升進士。海內右諸生。經術謀王體。詞章作世程。不才巖石下。迴首望光榮。古訓疇咨日。文明闡化時。君爲萬家縣。誰定一王儀。名下看佳士。人閒見舊詩。豈無清切地。州縣有程期。月裏丹葩遠。人閒杏豔張。天官行故事。風雅藹餘芳。左掖親承詔。端門出綴行。眼明茅屋下。猶見賜衣黃。江雨閒行人。江千雨又新。今朝下垂榻。幾日望行塵。冰雪鴛遷樹。江湖雁得春。非君被軒冕。懷抱欲何伸。

舊業推門地。聲名出禮闈。平生著風則。長世有光輝。官序須清績。台衡起白衣。談經無復日。爲別更依依。花竹窮清玩。山池屬素情。荷衣隨楚製。芹子入南烹。已作歸屠釣。終期變姓名。惟應一邱壑。垂白向升平。

春日題水軒

菰蒲生戶外。翠羽落堦前。日出雨無影。春濃花有煙。汗青書在簡。血碧淚經年。邱墓池東北。看雲日日眠。

送黃晉卿之任

隴蜀衣冠盡。中都魯一儒。明時用文事。榮秩映江湖。爲治須三尺。起家祇五車。天台山水地。倘可曳長裾。

五言排律

送烏經歷歸二十韻

大府羅賓彥。脩門得俊賢。明時優外任。密畫制中權。曉日卿雲麗。高秋白月懸。千尋看壁立。百鍊識金堅。殷浩名無忝。崔羣美可專。緋袍臨僻壤。華髮憶流年。山揖金華秀。城當婺女躔。民風仍皞皞。王道故平平。玄暢塵囂外。芙蓉爽氣邊。憲臺依翠柏。幙府擁紅蓮。法謹持三尺。書應受一編。公言歸可否。德意賴承宣。歛郡推夷直。河陽贊巨川。可能羞噲伍。豈復愧盧前。淵媚珠含彩。林輝玉吐煙。豫籌纔婉婉。歸思忽翩翩。趨拜麒麟殿。遠離玳瑁筵。幾時嗟螻屈。後日看鶯遷。空遣參軍紙。曾辭太守錢。雙溪清若許。明日送歸船。

鹿皮子集卷之三

七言近體

題建炎遺詔

解下塗金膝上衣。一作蛾眉金縷衣。忽忽命將墨淋漓。圖中吳楚無端拆。月裏山河一半虧。銀漢經天都是淚。杜鵑入洛不如歸。黃衣傳詔三軍泣。不是班師詔岳飛。

呂氏樵隱圖

山藹氤氳溼綠蕤。無人空谷伴狂歌。千年甲子碁邊老。兩字功名世外多。乳鹿穿雲覓芝草。驚猿抱子度烟蘿。心閑便是神仙侶。莫對癡兒說爛柯。

蛺蝶圖

禁御名園信所之。深紅膩紫共春暉。人疑落葉有生色。我道飛花上故枝。掌上豔姬垂袖舞。屋頭故吏竊香歸。花中只許秦宮活。未必莊生入夢思。

太霞洞

石林深處飢胡麻。幾度登臨送日車。雪到峯頭猶是雨。雲生石上半成霞。相看露下朝華草。不放春歸冷豔花。地冷花凋。○一作樹臨陰壑。元無影。日傍晴烟不度花。魏紫姚黃風捲盡。人閒蜂蝶到山家。一作暮夜相過。玩清山前鄰笛兩三家。

飛雨洞 流沫成雨。中有小泓。

蜀天萬里入東州。一作天梯石冷翠侵扉翠欲流。朱鯉有靈時出穴。白狐生火幾經秋。山中十暑寒猶在。

潭上千年雨未收。昨日西林晞白髮。溼雲依舊滿貂裘。

碧落洞

灑氣翻衣露滿懷。人言天上我驚猜。近從月裏種花去。遙見鼎湖飛葉來。使我加餐有黃獨。為人題榜是

青苔。杖頭化作光明燭。願逐東皇下九垓。又一首云。聽盡東林夏雨聲。自攜桐几下巖肩。白雲持得人誰

地絕重黎後。猶自披雲望玉京。

蘿衣洞

蘿衣草帶護烟蓑。一作手攜綠楚國狂夫尚楚歌。石影到溪千丈勁。藤痕入木八分多。泉分少白山中雨。

衣取雲門寺頂荷。一作卷中真跡。臨紅葉。身上生衣。捲碧蘿。洞口樵人誰語汝。碁邊相遇懶相過。

五雲洞

飛梁一作壓水石苔蒼。洞口飛泉瀉一作石梁。屋上春霞常易散。雪中樹影不曾長。陰雲滿地晴飛白。雨

蝶依林暗貼黃。一作松花入酒傳香碧。具葉分題寫硬黃。手裏芙蓉渾忘卻。蓑衣日日釣滄浪。

巴雨洞

溼雲侵袂一作細泔泔。自曬蓑衣石上楓。海月來飛長雨下。仙家半入漏天中。石稜近水依崖長。山柿著

霜連葉紅，卻笑當年補天手，煉成五色竟無功。

梅墩石

篁竹瀟瀟暗一作水鳴，朝暎奕奕耿殘星，繁花無處分南北，明月何時厭死生，石樹裹雲長自溼，日華映雨半邊晴，霜晨露夕長來往，幾度攜琴鼓再行。

越觀在巖頂

吳根越角兩茫茫，石傘峯頭俯大荒，鳥道北來通禹會，雁程南去盡衡陽，雲移暫覺天河沒，月暗不知松影長，天姥若耶他日事，明朝采蕺下山梁。

陳氏山林春日雜興

賸水殘山瘴海濱，一丘一壑可全真，月華一作夜光，雖死猶隨我，春色為塵亦污人，石護生香成石乳，花連別樹作花身，他年終擬忘名氏，碣石桐江理釣綸。新接桃梅。○一作人問傾奪。非吾願。思怨吾知可感神。

溪亭

百尺層崖接翠微，潭空石影曉離離，雲隨白鶴翔千仞，月與青猿共一枝，不信水深騎赤鯉，曾因夢裏口黃鸝。一作床下苔花大如席。亭前巴字細成溪。芳洲翠羽無人拾，自補山中白接籬。

醒酒石在少微巖下有窟櫃

夢渴醒來賦楚騷，一作首壓搖，紛紅駭綠未全銷，樽空鸚鵡杯猶在，歌罷琅玕樹尚搖，夜久月方臨石上，雲低

雨不到山椒。平泉池館吾無分。栗里徵君或可招。

翻經臺

石函朱几曙雲中。雲散臺高萬象空。枝重有時來白鳥。雨殘無處看晴虹。血書貝葉三年碧。秋入羅衣半袂紅。幾度山人同聽法。翠微深處石池龍。

東白草堂

屋後茅籬與水平。屋頭怪石列爲屏。捲簾帳下雲先去。步月庭前樹欲行。一作齋餘瓢裏水猶活。晦近花前月尙生。白雨侵階渾是綠。一作黃山。童食柏久應青。如何庭下朝陽影。盡在少微巖上明。

望月臺在巖下

玉簫吹斷暮雲平。散髮臨風露一作夜。氣清尾見欲當南。紀出月銷半入楚天青。松高琥珀無苗出。蟾老丹書滿腹生。桂子何年生一作來。石上丹英零落樹冥冥。

銀谷澗空碧亭

水光山綠滿闌干。上有琉璃萬頃田。水鳥臨池青入羽。仙人睡地碧如天。雨添銀谷空中翠。雲是舊桃花上烟。只有垂猿綠一作綠衣。無倒景。有時弄月到亭前。地多海棠。○一作有時卻挂綠。聽前。

少霞洞山居

少霞洞口裏。一作探金芝。千歲山南前。一作聽碧雞。煮石鼎中饒綠薤。封書口外有丹泥。度關僧寄婆羅樹。入

市人傳木客詩。又卻一作抱瑤琴向陰洞。青禽啄碎碧梧枝。

圓谷澗一作臺

雲在闌干葉在庭。飄蕪一作中無藥事貞。一作飛騰丹霄有路星辰近。一作長河如帶東南拆。明月無根日夜生。滿袖天香和夢冷。半村雨色傍林青。仙人約我瓊樓上。一作瓊樓玉宇丹霄裏。只恐月中秋更清。

少霞洞一作室

煙霧霏霏溼麝煤。一作長文生綠硯硯生苔。一作海棠滿天風拂地鳳笙下。楚雨入吳龍女回。石壁水花一作泉湧出。海棠花前春色鳥銜來。洞天只在風塵外。門外遊塵拂不開。

圓谷澗

水樂聲中共夕涼。雪花片片灑衣裳。山中古樹如魚大。一作碩果如瓜大。水上遊絲似線長。一作雨。柳絮散為萍梗紫。花根染作牡丹黃。一作采藥奴春蕊作。自從西域神僧死。一作僧去。澗上南地無人識水香。

少霞洞

柏葉山前綠石扉。溼雲墮地不能飛。青童臥護千年鹿。木客相傳一派詩。龍帶雨花臨硯滴。一作海。僧添樹葉上秋衣。山人晏坐青霞外。飲露淪風度歲時。

秦素壇

竹死烟寒樹不榮。石壇千仞與雲平。春來天上元無色。雨到人間方有聲。夢入松風吹不斷。詩如芳草剪

還生陶山北望飛霞散夜半有時孤鶴鳴一作他年舉製鄉生律盡種山樊與杜衡

招隱巖一作山

何年積蓋與山齊樹轉峯回草徑微野火裂為方解石秋風不到寄生枝誰來樹下看雲坐半入人間作

燕飛箬笠巖一作柏葉山前今淨社不須更草北移山

紫薇巖在蘭池上

手種巖花對札峯花閒無葉紫茸茸人行鳧雁不到處家在鸞花第幾重綠水值陰還又碧青春著樹卻成紅紫霞莫入絲綸閣且伴山中白髮翁

札峯

皂閣山前小水明甌峯無影樹亭亭人從煙雨上頭立詩到鸞花過後清雲傍樓臺低地碧天將草樹染春青名山何事窮幽僻臨水登山已稱情

石甌峯

柏葉山前鶯亂啼小樓西望石離離北峯雲出何曾斷一作甌中雲起長如溼東郡門外一作山凡不解飛蘿葛相扶根著樹蟾蜍不死肉成芝黃梁夢短風塵暗不是山人好食薇

飛花亭

昨日朝華照夕曛又看夕秀比朝菌松高猿見古時月花晚鶯添幾日春盛露囊中封臈藥無塵袖裏裏

吳雲。人間何用春長在。只愛飛紅日日新。

水亭有流羽泉

少鳳飛花照水盟。一作門外飛水禽衝浪動軒盈。一作灑雲從薜荔衣中起。雨向琅玕樹上生。曲水傍人一作陰澗有泉。流白羽。嬌花無語答黃鸝。澗中日與山中日。一作池中日同上晴窗各自行。

清涼臺

水邊石影覆松亭。洞口飛雲細細輕。花重只因雲下溼。草寒誤向影中生。好風入夏傳芳信。片雨隨龍度月明。不用破瓜沉綠李。自從雪後有餘清。

忘憂閣

宜男葉上幾飛螢。一作冷夢筆醒來笑倚楹。一作聽天外唾如雲樣碧。一作杯裏酒江南春與草俱青。鑿寒已喜松丹熟。燭盡只消華豔明。無喜亦無愁可解。山人投老竟忘形。

南軒

瀾底菖蒲綠滿叢。石根水竹傍梧桐。人來遠地見山碧。月未冷時如日紅。春水有聲通北澗。晚花無信誤東風。人間不是高寒地。那得春紅入夏中。

雲山不礙樓

飛花墮地柳依牆。很石侵檐逕草香。人道峽中無落月。我疑肘後有垂楊。庭虛只放溪雲度。水淺不妨松

影長卻憶壺中天地闊。十洲煙雨正茫茫。

野芳園

桂子紛紛入我懷。海棠芳桂雪生葩。日移深澗松陰上。風引前朝樹勢斜。芳草無名多是藥。雲藤著紫不須花。牡丹未入曹劉室。元白歐蘇不用誇。

蘭池

空翠亭前露草繁。自栽蘭芷雜芳蓀。猿窺澗底風林動。鶯踏花閒水影翻。蚤就山林成獨往。晚從桃李學無言。國香只合依泉石。種向人閒恐礙門。

空翠堂

蕉葉蒨葵照檻明。山光入室雨初晴。平分天上無邊色。送盡江南未了青。息石長年依砌活。茯苓無種入庭生。亭西昨日林霏重。採藥歸來露滿庭。

山齋一名草易壺

幾一作夜山中作月荒。晨朝挾册傍初山。一作陽懸崖種菊紅多葉。開戶見山青一方。一作遠開戶草玄枝蔓長。
石上韋編新汗竹。研中白露半成霜。羲皇未畫非無易。石室遺成一作書不用藏。

山園

洛陽池館半桑田。斷竹操瓢日灌園。春日花連小東白。暮年草創大還丹。蕨薇自古猶長採。桃李于今竟

不言松桂桑榆隨地暖。雨餘苜蓿又闌干。

壺天在澗上一作壺天閣

宮殿隨身信所如。寓形一室似樓居。神遊八極皆吾土。天入三山三神山不滿壺。雨夜無人共清月。水扉幾度種丹魚。山童長怕漁舟至。不放桃花下五湖。一作利海中問別一區。晉香香積是通衢。花連葉蔓疑無。自從漁父穿花去。不放桃花下石渠。

鹿皮子墓

土蝕苔一作石。侵古瓦棺。化臺深鎖萬松開。坐看天上樓成日。吟到人間詩盡年。句漏有靈丹竈冷。孟郊未死白雲閑。江南春草年年綠。又向他生說鄭玄。

遊絲

兜率宮中拂不開。支機石上亂成堆。超凌塵埃高千仞。束縛虛空斷幾回。又逐飛雲縈草樹。暫隨片雨挂樓臺。詩成猶憶宣和腳。透過澄心紙背來。

臨花亭

主人病癖愛年芳。春日花荒夜月荒。調水分符到西澗。惜花封淚寄東皇。天生國豔春無價。日繞遊絲風有光。物色是空非是色。枉教蜂蝶一生忙。

惡雨愁風喜晏陰。夜遊秉燭晝傳殮。香添荔子能消日。粥費桃花怕減春。綠暗有人來折柳。紅飛剪紙爲

招魂竹閒午夢時。驚覺滿眼卿雲覆錦茵。

芳草生烟藥在房。鞞紅左紫共芬芳。丘園風雨三家市。草木文章萬丈光。花正欲言還寂嘿。春無自性不堅良。晚來只有鵝紅在。莫放香絲取次黃。

滿樹琉璃閒碧瑤。當歸葉長暎芭蕉。樹頭生雨時時溼。春色如花日日銷。杜宇有言終不踐。綠魚新種已生苗。今朝百舌聞鶯語。飛上梧桐特地嬌。

右挾長鑱左帶經。蔬畦藥圃照衣明。客來青鳳穿花去。草盡蒼苔上樹生。靈藥易荒長檢校。繁花無賴枉丁寧。來禽青李成陰後。更覓楞梨日給勝。

花在人間春自歸。去來何用杜鵑知。鶴銜瓊蕊來仙苑。雨引山薑過別枝。天出異香薰寶樹。日將五色染遊絲。主人莫賦傷春句。但使百花無盡時。

雨後金沙入柳陰。紫薇紅藥正紛紛。客來只道天開畫。春去盡將花囑人。越鳥啄殘松下子。吳僧寄到水中雲。蓮紅直到梅花發。何處人閒不是春。

松邊柳下日徘徊。鳥散飛紅墮酒杯。芍藥成叢當戶出。茯苓分種傍松栽。雲高卷雨從風去。花晚將春入夏來。亭下日紅如斗大。耐看不似玉玫瑰。

遠山過雨綠崔嵬。竹外青松竹下梅。滿樹丹青隨物換。平生富貴逐春來。歌珠一串鶯流出。花影數重風揭開。關右牛酥賤如土。莫教紅紫落成堆。

遠目樓

天垂平野樹團團。雨過平蕪綠更鮮。何事高梧遠如齋。只消寸草已淩煙。山遮春欲歸時路。雁入鳧飛不盡天。廬舍似蝸人似豆。天開粉本夕陽邊。

蠟屐亭晉阮孚避亂婺州

七賢老死獨南奔。袖有江亭墮淚痕。函夏盡為新土宇。醉鄉不失舊乾坤。金貂曾入丹陽市。蠟屐應歸白下門。惆悵黃門墓前柏。不禁三度見風塵。

西峴峯寺傍皆官山

聽盡熙寧水樂聲。斷碑無字倚荒庭。雲歸僧舍樹皆溼。犬吠獵圍山誤鷹。覆屋松陰遮日黑。隔林春色爲官青。故侯轍迹無尋處。丞相題詩擬峴亭。

雨後看山對酒歌。飛紅駭綠滿巖阿。一作紅銷綠萬重山外碧方寸。五色雨中青最多。亭下日生霞暎草。松根苔長葉成窩。一作峯漸欲危通月江源分付西流去。莫作門前東逝波。

涵碧亭劉禹錫題涵碧亭

涵碧池頭夏氣清。我從三昧起經行。移樽近樹傳盃綠。向日看山入戶青。人似亭前花不語。詩如江上草無名。山中水調知何限。不入熙寧水樂聲。

入谷沿流曳杖行。亭亡白谷半爲陵。蟬驚兩腋風初定。樹少多年秋不生。水急溜穿南澗石。雲深黍沒夕

陽僧。龜茲板上元和腳。猶有劉郎舊姓名。丙戌

池曲奔流下石渠。池頭空翠溼煙蕪。夏禽反舌餘聲盡。蔘荔連牆寸影無。僧麤屋頭猿掛樹。鳥銜窗外雨生魚。長安才子看圖畫。云是仇池隱士居。丁亥

上虞魏氏湖上精舍圖

湖上蘭舟水上亭。有時水漲與階平。亭前古柳經春弱。門外孤洲昨夜生。海氣遙連一作育王塔。蜃樓半入會稽城。山陰道士攜琴至。寫盡風聲到水聲。

停舟日日望東溟。蓼岸蘆洲露未凝。沙戶得花聯作口。吳姬雪藕織爲繒。馮夷送月臨軒落。海若分潮入井生。朝暮屯蒙丹自熟。披沙莫學趙臺卿。

雪巖石室

懸流脈脈又涓涓。澗水爲花到席前。我爲天穿來煉石。僧從雨下度流年。月中溜灑黃金淚。壁上雲生火玉烟。山下四鄰皆雨外。天瓢枯槁蟄龍眠。

洞天無暑亦無寒。淑氣芳風不出山。掃葉僧歸雲未溼。賣花人去蝶先還。滿庭脩竹落黃葉。千歲古松生綠煙。盡道雪中依裸壤。我疑夏室是冰天。

樓閣天然石削成。山爲棟宇石爲楹。丹砂伏火有光景。石屋依空無死生。葉落世閒多月色。瓢亡林下欠秋聲。山中水石皆吾黨。竹兔松雞不用驚。

滿林翠霧溼麻衣。山影遙侵白板扉。竹石無心吾所畏。煙霞有疾不須醫。夢騎鶴處天逾闊。歌遏雲時花不飛。燕子飛來背人去。吾廬無地可棲遲。

巖穴冬溫夏氣清。有時采葢度峻嶒。閒雲起作飛雲去。今雨還隨舊雨生。樹上菟絲低窄地。階前息壤暗通靈。人閒甲子何須問。只憶山花幾度榮。

丹萸滿地藥生茸。著屐登山春正濃。委羽山人來相鶴。天台道士去投龍。風傳花信歸何處。日卷松陰展向東。不見霜巖松下竹。空王未作已心空。

石樓草廬

一室寬於一畝宮。隔林竹樹影重重。青春著地十分綠。白日經天兩度紅。小草自憐無遠志。茯苓終不近孤松。未須西憶金華洞。只在週回百里中。楚氛千里海連淮。思子臺前望母臺。春在地中長不死。月行天盡又飛來。林亭清論松爲塵。荷屋寄生花作胎。七十九年殘喘息。欲從李白上天台。

哀江南効李義山

幾年王謝望升平。戎馬臨淮日繞營。萬里口塵暗京洛。五朝王氣在金陵。臨春閣上華林近。玉樹歌中璧月生。獨有紹興經亂後。聖賢相遇頌中興。

慧力寺斷崖

僧緣鳥道上穹蒼。下視斷崖千丈強。百里週回玄鶴洞。羣仙出沒白雲鄉。山藏宿雨禾生稼。日轉垂猿影過牆。未若鼎湖天地絕。無人折得碧蓮房。

鹿皮子集卷之四

落花圖

紅如肌血薄如鱗。李下桃根五色痕。拂地暫隨風絮轉。繞亭不似雪花深。人亡碧玉名猶在。煙盡黃金鑿
尙存。滿地丹鉛污草棘。何時凝綠遍丘林。

空碧亭

晴光潭影共澄鮮。雨外林陰色更妍。碧海如杯誰縮地。青冥著水誤憂天。河垂澗底遙相屬。斗入人間卻
右旋。病叟年來倦登陟。朝朝翫水夜聽泉。
長林衣被蔚藍光。水樹重重護曲防。碧落不隨河顯晦。白榆卻種澗中央。石泉飛落萬瀉發。松影淡時千
丈強。我向札峯高處下。如何倒卓柳陰傍。

河漢縱橫北斗翻。縣泉激石起層瀾。水流石上舒還卷。月繞樓頭碎又圓。龍火溼光生澗底。仙人倒影落
人間。無邊空處無邊地。盡入鷗邊一尺天。
星河水鏡自徘徊。白石清泉是鏡臺。人道月從亭下出。我疑空入土中來。崖陰水色濃如染。風裏波紋熨
不開。一碧是天還是水。池頭涼夜碧如苔。

樓臺倒影照虛明。細浪鱗鱗去不停。風舞翠綃浮略約。月移黃素上軒楹。蔚藍天近池深碧。烏柏葉消泥

轉青牀下一波添一月。青銅鏡裏一時生。

空碧亭老梅

雲蒸雨蝕半枯槎。空碧亭前雪一車。曲誤掀翻簾外朶。月移不動水中花。十年春信隨風度。半畝崖陰逼樹斜。暮景無何水仙至。萬花頭上欲饒他。

石磴

磴平如席草茸香。盛夏宜人石氣涼。杜宇血銷添碧燐。山雞食罷化餘糧。赤松有約吾將老。白髮無愁不解長。醉則枕流眠枕石。看雲不復據胡牀。

菊菴

秋深紅紫滿秋籬。薰帶蘭英綠照扉。猿飲澗中甘鞠水。雲粘石上舊蓑衣。月知人境來相覓。花有心情死不飛。桃李自開還自落。卻疑蘭菊未忘機。

山房

冷雲堆裏散人家。鹿幘羊裘不衣麻。門外樹身無歲月。山中人語帶烟霞。雲侵壞衲長生菌。風斷遊絲半度花。采戴林深人不見。連筒引水自煎茶。

秋色觀

庭前丹葉映榆黃。水傍芙蓉晚桂芳。樹入畫來新著色。山無錦裏只憑霜。水中烟帶秋雲冷。花上月如春

日長不是風沙千萬里，不知何處覓秋光。

飛觀

日高空翠拂簾旌，茅閣飛飛照日明。銀色榜題章草字，烏絲闌寫越花名。何須舉翮乘風去，曾入浮宮看月生。卻笑羣仙餘習在，隨身宮殿逐人行。

絕唱軒

問誰投筆早來過，春日華陽春睡多。懷裏錦空鯨已卷，松根苓長葉成窩。詩無懶髓痕猶在，夢有鸞膠斷若何。洛下書生無苦思，我今餌藥臥山阿。

飛雨亭

飛泉五色暎花梢，秋色觀前看玉豪。花落空中和月冷，樹當溼處見雲消。依依雨氣侵螢火，一一水紋生鶴毛。幾度下簾山影動，臥看紅日到芭蕉。

散菴

漱流枕石傍寒林，散髮酣歌稱散人。蝴蝶枝頭無昨夢，初蟬葉下見前身。衣沾寶掌泉中雨，肉有盤陀石上紋。不見屋頭樗櫟樹，無材入用老猶存。

鑿谷

幾回木落聽秋聲，又被春風染樹青。疎竹陰中山影重，冷雲葉上雨花生。寒沙引水來遊鹿，別樹開榛種

茯苓石甌峯南甌峯小。許渾詩裏舊知名。

鑿谷澗

清流拂石下巖隈。澗底菖蒲曳綠苔。野鹿避人懸樹宿。溪魚乘水上山來。翠連春草誰能拾。風觸石崖彊半迴。自入夏來涼意足。更移脩竹澗邊栽。

伏蟾山

山上飛雲去不留。山中蟾兔又經秋。斗臨河曲侵鶉尾。露上莎根到草頭。綠桂花中歌白苧。碧梧影裏飯青牛。有時竹上蟾蜍下。滿腹丹書溼欲流。

寶掌泉

屋上無端雨亂飄。雨留石罅碧寥寥。浮光出穴藏丹淺。浣水爲花到地消。石髮年深長滿洞。玉魚春冷未生苗。泉山自是蛟龍窟。頃刻陰雲滿樹腰。

尋春園

覓春無路得寒林。萬里清和此晏溫。載酒尋芳常恨早。無金入塢只藏春。柳濃不似生時色。花斂仍依褶處痕。獨有悠然觀前月。石林寒絕也隨人。月樓花落水侵岑。紫石峯前綠又新。承露盤中盛臈藥。無塵袖裏有晴雲。松高猿見古時月。花晚鶯添幾日春。籬口口口尋不見。楞梨綠李下紛紛。

雨望臺

鳥傷墓道有無間。興濟橋東衆綠繁。林外日斜虹有影。塔前雲去石留根。葉隨風轉時過樹。雨傍山來不入村。更著蓑衣看瀑布。天葩日暮正翻翻。

山館

石甌峯前綠草肥。菟絲挾雨上梧枝。天台道士投龍去。少白山人相鶴歸。首着帶茸初暎日。雕胡落釜半成糜。石楠花落無人掃。誰臥水陰歌采薇。

山莊

澗中薏苡綠如藍。枸杞黃精滿屋山。掃葉僧將猿共爨。賣花人與蝶俱還。雲生石笱埋雙樹。雨引銀涎過八埒。林下四時春不去。澆花采藥送飛年。

琴臺

臺下湧泉如鼓鐘。亭無燕語有風松。石根漸見蘭成畝。影裏不知花幾重。月夜聽泉翻羽調。水聲和譜寄山翁。自從獨往窮山後。不見繁聲入亂中。

飛花亭

細桃濃李墮餘香。水麝衝雲度石梁。芳樹斂華貪結子。嬌花無骨不禁霜。鳥銜墮蕊春無色。日轉游絲風有光。杜曲詩人愁欲絕。山人不解惜年芳。

游子拈花怨落暉。山人猶恨落花遲。絮拋簾下鶯無力。果在蕊中人不知。紅日正酣那是雨。青皇臨別更留衣。年來杜宇惜人事。卻向陽春去後啼。
梅殘直至落花飛。紅暎飛花綠暎葵。風信入林添淨食。春光一線上游絲。絮輕便欲排雲去。花好多應換骨來。二十四番都掃盡。水花剪下作寒梅。

風香亭

池頭爽氣日徘徊。竹院何曾有麝媒。月殿桂枝飄子落。鼎湖蓮葉轉空來。風隨太乙凌波起。花爲胎仙傍水開。香積界中天地闊。景差何用上蘭臺。

春日閨思

白玉堂前雙燕飛。堂中思婦怨殘暉。臂環寄遠青蕪合。瓊字題乾白雁歸。醉倚合昏驚葉暗。愁尋豆蔻妒花肥。窗閒昨日同心錦。染罷香絲不上機。

席家洞洞在席家谷口前後相通

天梯石棧落霞邊。月地雲階且醉眠。束縵才通山北戶。崩崖盡展洞中天。雨餘秋菌化爲碧。石上霜風不解丹。聞道仙人曾控鶴。羽衣環珮玉珊珊。

石筍

金莖半折尙亭亭。銅柱稀微見刻銘。花日漸移連影動。石根不死有香生。山前留眼通靈海。天上無人記

摘星何處人閒覓此竹。昔年曾出夜郎城。

霹靂石

雲根斷裂翠陵嶒。七竊都忘世已驚。玉女今爲擣衣石。晉人猶覓少微星。松高琥珀無苗出。蟾老丹書滿腹生。卻憶天台狂道士。石中衣襪竟通靈。

跳銀溪

枕石聽泉伏草萊。跳銀溪上日徘徊。山間遠樹迎人出。日轉晴虹渡水來。雲氣長連西澗石。春寒猶在北枝梅。谷中幾載秋無黍。沙上菰蒲暖更栽。

書房

休名不立死如麻。挾册空山望碧霞。書在終難招李杜。灰寒無處覓陰何。一作門外雨生雲沒春歸一尺人間淚。雲暖萬重煙際花。一作天雞颺下唐時風景尙堪留研席。浮生憂樂向來多。

園

築園卻欲留方士。一室園中度歲年。有客持雲坐盤石。無人伴月出蘿煙。晴晞白髮三千丈。寒折朱絲五十絃。玄圃方壺君莫問。人閒回首卽神仙。

春日題水軒

黃金綠水細粼粼。葑合平池綠似雲。鸚鵡無言初病瘴。丁香不結又經春。行稀蠟屐留前齒。坐久玉琴生

斷紋幾度凭欄愁舉袂。春花半作庾公塵。

樓氏雲樓

試上雲梯興不窮。虛窗瀟灑絕塵踪。雲含雨氣三千里。樓插天心第九重。碧瓦朱蕙嘗病鳳。白衣蒼狗不從龍。眼前景物清如許。詩思還開錦繡胸。

繡衣亭分題送李齊賢三首

彩鸞銜誥傍花飛。知有恩榮出帝闈。八角靈文金作冊。三天使者繡爲衣。華陽洞古亭猶在。句曲山深鶴未歸。寄語仙人張伯羽。何時邂逅說玄微。

占星臺

椎碎臺前六合儀。登臺猶自說璿璣。靈槎有客侵河鼓。別墅何人覓少微。銀漢經天還北拱。玉蟾入月卻西飛。太平共喜興文教。奎壁煌煌夜吐輝。

半湯湖

湖上殘煙弄薄晴。湖堤楊柳午風輕。白波只尺分寒熱。赤鯉東西異死生。天向月中藏日髓。人疑陽裏有陰精。廣文暇日頻相過。幾度沉思翫物情。

暨陽湖分題送李仲常江陰知事三首

白浪浮天雪作堆。羞將俗客洗塵埃。月從水底沉鉤去。船似鷗邊泛葉來。野屋有籬編白荻。漁磯無屈藉

蒼苔功曹吟苦多詩渴。擬借平湖作酒杯。

釣臺

憶昔玄璜上釣鈎。鷹揚曾起佐姬周。臺高人在空中立。雲靜從天水面浮。石裂猶疑千古雪。風吹不斷一絲秋。政成蓮幙多清暇。他日停驂此地遊。

翠光亭

亭前練水細如縈。亭上君山玉作屏。林斷纔通吳月白。雁飛不盡楚天青。莓苔著雨長黏石。翡翠迎風欲墮翎。惟得步兵迷望眼。詩成正值酒初醒。

詩林亭

少日論文氣似霓。看花覓句到花飛。吟成思入月中去。語冷心從雨外歸。林下樹寒和石瘦。雲邊螢溼度花遲。眼中有句無人道。投老拋書衣鹿皮。

玉雪亭

蓬萊山頂玉爲峯。夜夜晴光吐白虹。石髓多年化韶粉。冰華無意屬東風。一天素月連雲冷。萬斛明珠墮地空。只恐高寒禁不得。乘鸞飛度碧瑤宮。梨雲柳絮共微茫。春入園林一色芳。枸杞通靈空吠月。芙蓉到死不禁霜。夢遊蓬島瑤臺曙。歌落吳雲玉樹長。亦擬廣寒親學舞。朝來新製白霓裳。

冰夷遊遍列仙家。片片臨風散六花。陰壑有光迷白月。亂山無處覓青霞。臺高漸見石稜長。枝重不禁梅影斜。聞說銀河都剪碎。津頭幾欲問星槎。

六丁鑿碎玉稜嶒。刻玉爲花笑裂繒。石蜜和漿調露蕊。茶鐙無水斲崖冰。城頭看樹低三尺。雲裏有山知幾層。欲寄江南問春信。珠璣落紙筆花凝。

凍雲巖壑曉瞳矐。目極齊州望欲空。落月回光窺上界。嬌花無信誤東風。曲吹鐵笛驚雲散。槎向銀河與海通。野客燒丹深洞裏。自調火候似春融。

花邊亭臺水邊門。壺中別是一乾坤。銀蟾飛去秋無色。白石長來雲有根。樹印蚪枝翻畫譜。僧調獼髓補詩痕。相如健筆誰堪繼。好聘詞華賦兔園。

銀漢傾翻貫月查。驚鴻無處認江沙。水晶簾密秋光冷。華蓋峯高天影斜。飛瀑半凝蒼玉珮。薰風不度碧桃花。山前山後多鄰曲。盡作江南富貴家。

俗塵無路到巖扃。瓊作池臺玉作亭。海月寒通千頃白。楚山瘦減八分青。回屏紋細裁龜甲。野褐年深補鶴翎。應有才華奪天巧。天葩飛墮滿中庭。

羽仙飛步駕青鸞。仙袂臨風響佩環。琪樹多根來月裏。瓊花無夢落人間。春回壠首梅先覺。舟入山陰客未還。我亦玉堂揮翰手。他年鷓鴣筵朝班。

送蔡竹澗江山教諭

仙霞嶺與落霞齊，乘興吟遊日未西。
簾影到池元是水，縠紋浮雨卻成溪。
煙清院竹鸞窺客，日暖宮芹燕拾泥。
莫道廣文官況冷，窗前生意草萋萋。

送余善之歸瀏陽

瀏水沉沉上有山，駱駝洲渚鬪漩湍。
浦楓不向霜中赤，湘竹猶餘淚下斑。
書屋昔年驚遠別，錦衣晴晝喜初還。
哦松未盡平生志，莫戀亭臯放白鵬。

次王吉夫暮秋旅懷韻

風吹白日下遙天，容易人間換歲年。
菊老不隨霜共落，雲飛卻與雁爭先。
探囊野草皆爲藥，入市山梨便直錢。
遠道故人成久別，每因景物思綿綿。

客路風霜厭遠行，芰荷猶暎舊袍青。
東山雲杳家千里，南國秋深雁一聲。
玉筍班頭紅日近，金華洞口白雲扃。
求仙何似求名切，幾誤還丹煉未成。

送盧經歷歸北

汝南不識有宗資，幕府惟聞贊畫奇。
化筆幾驚霜共肅，歸舟祇許月相隨。
松花風老金華洞，桐樹烟青婺女祠。
曾是舊時遊適地，郡人終古結遺思。

金華通天洞

石扉高曠碧芙蓉，二室連翩逼翠虛。
字裏蒼苔猶自活，茶邊寒水易成枯。
吳中太白爭華一作榮地，林下青

癩化石餘三洞周回五百里。金堂石室盡仙都。

永日觀

幾番落葉樹陰殘。說與山人更不看。春日花連小東白。暮年草創大還丹。月車長遶吳天角。石影生從太極前。只把蟠桃分歲月。一花一實一流年。

拙齋

無心奔競已才疎。投筆拋書學佃漁。石鼎有時然綠楚。水扉幾度種丹魚。夏禽反舌餘聲盡。薜荔連牆片影無。我亦年來聲跡斷。莫題書札問潛夫。

心遠菴

著屐登山援葛藟。聽猿待月夜眠遲。書成袖裏燕銜去。月死枝頭猿不知。寄遠豈無萱草帶。勒銘自寫茯苓芝。何須更覓桃源路。朝市山林處處宜。

石廬

風磴盤空冷逼人。村居穴處古遺民。沙飛滿地猶如燕。草綠知天不愛春。河漢帶星臨石上。廣寒無月閉花身。只愁急雨隨風度。結屋半閒留白雲。

雪觀

綠楚丹雘處處迷。東風吹下萬珩琪。月無寸影夜如曙。地有六花春不知。玉樹曾聞後庭曲。天葩別有寄

生枝瓊樓銀闕知何恨。約客瑤池未可期。

三泉

泉眼離離傍石稜。奔流脈脈到軒楹。詩成石面花無數。夢冷池頭草不生。江夏茶經有遺譜。南礪水樂變新聲。林居漸覺機心斷。渴鹿逢人自不驚。

瀑布

怪雨蠻烟入座寒。居然烟雨隔晴天。化爲河海冰三丈。剪下松江水半邊。蜀客槎星向天上。翰林詩句落風前。自從擊碎潭心月。直至于今不肯圓。

石礙樓

冷雲堆裏散人家。疊嶂回峯往往遮。觸石纔通西澗水。借春只有北枝花。月臨古徑松陰闕。風引前朝樹勢斜。誰信湖中天地闊。庭除帷幕浩無涯。

少微巖

石醜松寒榭葉夏一作乾。振衣又在碧霞邊。南州處士星猶近。今歲中秋月未圓。十五日望雲葉長黏巖上石。雨花不滿漏中天。麝香眠處休驚起。綠桂初紅果欲然。

西巖紫霞洞

萬壑煙霞護隱居。西巖洞下是華胥。殘紅墮地五銖重。漲綠過樓一丈餘。瑤草碧花牛氏石。錦囊玉軸米

家書東州歲賦三千粟，亦我依巖學佃漁。

山堂

石廡寒來雪易凝，札峯良夜月盈盈。人離雪外只方丈，月比城頭低一程。息石有稜依砌活，茯苓無種入庭生。白雲寒處人蹤絕，不是山光說性情。

贈蕭浣平寇

人物江南第一流，將才儒術兩無儔。英雄門列三千士，勳業家傳萬戶侯。金虎佩章光奪月，玉龍出匣氣橫秋。奸回向化煙塵息，坐擁笙歌醉玉樓。

次韻黃晉卿見寄之什

幾載丘林草木黃，故人霄漢獨難忘。宮衣雨露猶沾溼，文律江湖共短長。筆蹟舊時傾褚薛，才名此日數鼂張。他年明月中山寺，重與詩人話夜涼。殿前對策士如牆，我對山人說坐忘。歲晚單衣祇自短，愁來白髮有時長。山中蠟屐晴猶著，石上朱弦雨更張。有客江邊期不到，只今秋日轉淒涼。